

聽

雨

樓

隨

筆

聽雨樓隨筆卷二

德陽舊有孝泉東漢姜孝子詩妻

鄰僧塑佛像於後殿以招香火歲時拜禮者萬人邑人馬能修年二十餘袖鐵椎擊佛像碎之眾大譁能修曰祠祀孝子表先賢正風俗也何爲以佛像溷耶若能爲厲吾自當之毅然徑出僧與首事諸人合詞訴縣云并毀龍牌从不得直成都守王爾鑑精明吏也研鞫得實蓋僧以塑佛規利碎佛計阻將本寺龍牌送別寺而以別寺之龍牌擊毀甚能修罪至是抵法能修號健齋張懷浦爲作碎佛行

云健齋先生眼無物俠骨錚錚不可拂低頭祇拜孝子祠
放膽不知西天佛西天老佛忽破戒香火直爭孝子界先
生奮臂往擊之丈六金身一時壞天龍夜叉救不得督目
金剛齊失色佛也無言僧也言三途八難恐難釋先生曰
咄爾何知此地東漢姜公祠我朝孝治釐祀典彼無君
父安得相追隨佛若有靈罪在我阿鼻地獄無不可不然
先教佛捨身燒取舍利投諸火城鼠社狐失所利織成貝
錦訴大吏大吏前身韓退之手捧秦鏡僧無詞至今人過
孝泉側不匱之思問誰錫

馬永修吾東濟寧州牧諱希賢子母蒲孺人病癱告歸奉

湯藥衣不解帶者十年每月朔望至姜孝子祠拜祝母忽
一日下堂謂之曰我夢姜孝子母以手相攜不覺行至此
囑云爾子永修孝心所格扶持爾起自此康強等於平昔
無不稱奇

南川周士壽號仁山從其兄松崖宦山東延歷城周林汲
先生永年授經質甚鈍作文拙澀不能成句先生語松崖
曰彼非此道中人不可爲也仁山歸里竟入泮及回山左
怪問所以云出門後渡黃河觀太華閱劔閣棧道之險經
嘉陵岷江之奇忽覺耳目開朗心胸爲之豁然古人得江
山之助良有以也旋中乾隆丙午鄉試

涪州侯懋樹浙江海鹽令跌宕文史風流宰官也有世家
青年孀婦欲嫁而難於發端藉事與家人構訟婦有姿兼
擅風雅多覲之者咸思藉官一言成事侯亦微窺其隱堂
訊時問婦云聞汝能詩吾先以詩示汝如能解卽與汝判
案遂書一紙擲下詩云破鏡初分月不圓琵琶欲抱上誰
船秋風近日多涼薄吹到墳頭土未乾婦得詩叩首求息
訟侯一笑而罷婦矢志守節終身撫孤成立詩可以興感
人微矣卽此一端不愧循吏

按乾淫之乾在十四寒當時意不在詩故失檢耳

蜀中大山以峩眉爲獨秀山志載之詳矣詩賦紀志不勝
錄漁洋經過嘉州再三見諸題咏遊凌雲頂獨愛安松溪

磬四絕句一云林竹斑斑日上遲鳥啼花暝暮春時青衣
不是蒼梧野却有峨眉望九疑或謂松溪父佑失耦聘楊
氏爲繼室未婚佑卒楊號泣奔喪爲佑守節勸還母家不
應蒼梧一絕蓋指楊事言在此而意在彼漁洋但賞其寫
景之工未嘗博考不免皮相其說新矣愚意未敢謂然凌
雲有九峯故借以立言不落正面而以比擬出之便曲折
有風致正詩家不歎相處如指楊氏事彼二妃望帝豈臣
下所敢借喻且其餘三首又何指耶杜子美一飯不忘君
偶爾寫景適情說詩者必以爲某句指某事某句指某人
穿鑿附會眞詩亡矣漁洋賞鑒正以空寫爲高也然其表

章楊氏博徵見聞亦足爲松溪生色

張亥白問安船山兄也工詩清新超拔不及乃弟而和平
安雅得風人之旨抵成都云眼明城郭枕江開嘉樹青蔥
絕點埃小市人家饒水竹長橋燈火見樓臺山從井絡雲
中盡人自蛟龍窟裏來誰信半生詩酒客船窗兩月罷銜
杯參天峽石鬱嵯峩盛夏灘流逐漸過直與波濤爭性命
可堪歲月老關河艱難涉世身何補辛苦還家鬢已皤從
此稻花香影裏未妨高枕臥烟蘿詩龕詩話載其大槁行
獨奇崛可喜或謂末四句刪爲竹枝更覺逸韻悠長夷陵
江下江茫茫一聲欸乃江中央吳娘十五竹枝曲解唱巫

山空斷腸其室陳湘箬名慧殊亦能詩有遠香齋稿紀其
秋雨篇云瑤房玉殿秋風起美人粧鏡澄秋水明月爲瑤
雪作膚朱唇皓齒紅羅襦飄颻風雨溼金井羅屏繡幕愁
相并迴身却立揮朱絃可憐纖指流聲寒欲彈未彈意轉
索碧雲墮地梧桐落

刁隆泰合州武生乾隆三十六年從征大小金川大小二
百八十五戰奏凱引見 純皇帝命袒臂錄重傷八處

賞賜福字阿相國贈以詩云萬里金川奏凱還聯趨 丹

陛覲 天顏承恩裸體論功日驗得刀翎八處斑授江寧
副將歷陞總兵嘉慶十年告休給俸終身年八十尙能騎

射制府鐵冶亭贈以聯云帝許成功歸畎畝天子老健廕
兒孫

龔巽江蘇江寧舉人乾隆五十五年宰榮縣於此君亭補
植楊柳芙蓉敍云榮城枕四山麓署西偏地凹下廣可百
弓昔人因勢利導強半爲池雜植樹木樹草亭於水中央
通以略杓紅蓮文藻錯出其閒但望牆外岡阜如小兒仰
面老輩苦不能悉鬚眉爲缺恨焉蕪溪老人余戚誼也其
子松巖任榮縣令就養於署遊覽之餘忽若有得卽高阜
處創此君亭洞開八窗晝與客較棋酒閒製長短調付歌
人入管絃夜懸珠燈則樹影波光迷離倚枕山若突然而

高水若淵然益深誠風流豪舉哉庚申春余蒞治官聞舊
事而此君亭已頽兩載矣環步曲池草蔓烟荒了無人迹
惟枯楊根春氣未息作柔條莖莖如線耳圍與暑雖僅限
一牆下石級數武然案牘不接於目呼號不入於耳雲流
水止別有天地偶暇時借作湯沐邑宛類武陵漁人入桃
花源視聽一爲之清雖未能久畱固可去來自如也歲梢
斷金線柳百餘條三變芙蓉枝亦如之用西湖二橋法錯
綜閒插爲春風秋月預置歸宿地至若廣老人遺意就舊
址立小樓踵行觴詠網羅溪山此則大關福命未宜先設
計較墮諸幻想因果也乃爲詩紀事云池邊旣嘆見山淺

屋中又恨去水遠二美難兼熊掌魚議割所愛誰當遺菘
溪老人就養時思登壘斷居其奇此君亭成眼光活八方
上下無不之開窗我主眾山客排闥不知庭宇窄回顧池
心碧玉簪醉止賓筵脫巾幘沿堤插柳閒芙蓉菡萏圍入
錦窠中花魂波影互搖曳凡諸色相皆玲瓏憶昔陪遊皖
江上與適樓東臥酌唱潑墨毫涵九華雲長歌節擊黃湓
浪先生工書畫兼長於詩我來公去址空存手栽大半供樵斤故吏
艷傳詩酒社花皆有福能長春慚無風雅繼前代自信此
中微有會琴焚鶴煮何必無若輩且須置度外三九四九
風雪號勾萌胎結元氣包橐駝之業亦不易冥心直造天

地交樹藝既儲樓擬葺眼睚擲向虛空立花吾步幃柳吾
門水吾楹檻山吾壁亦知種樹需十年官如傳舍少息肩
難畱雙眼見拱把况擬百尺藏風烟我樂人樂等樂耳何
必萋萋區彼此昔人到卽遺愛畱快事寧忍及身止石可
爲友鷗可盟無情情至亦生情何時花開不可酒何地春
風無月明未來過去中無我領取眼前吾計果君不見榮
藩故府青山空羅漢松根吹鬼火

嘉慶己未有人鈔寶鷄題壁詩十八首傳觀憂心家國豪
宕感激始知有船山張問陶先生旣而先生出守萊州癖
詩耽酒逸氣凌雲兼工繪事嘗手爲林夫人寫小照林謝

以詩云修到人閒才子婦不辭清瘦到梅花先生有句云
春衣互覆宵寒重繡被聯吟曉夢清可稱佳耦然而如甚
周我東云幼隨父客遊姑蘇先生已辭官就醫來蘇又往
鹽商查小山處與我東尊人詩酒往來因無子買侍姬置
小山別室不敢令夫人知也久之微聞聲息盛氣尋至船
山遁藏夫人直入查內室搜索小山內人笑云吾家丈夫
不惜萬金買一妾列屋而居者數十子未嘗忤以言夫人
何量之淺也先生有妾亦不匿予室林無辭退出仍尋船
山逼問船山慮姬摧殘闕日出見弟壽門爲縣丞攜妻來
視兄壽門妻勸林云如此男子謂之已死可耳何必與言

合室大闔明日船山見客笑云天下奇事竟有弟婦代嫂
行如者有句云買魚自擾池中水抵鵲兼傷樹上枝蓋記
實也船山女兄問端淑徵女弟筠俱能詩女甥丁菜芝亦
刻有詩集

周石書立矩南川佛坡弟也乾隆丙午舉人就職通判詩
集經張船山趙甌北兩先生評定贈友云天生鴛鴦偶唱蓮
枝香茗夫人絕妙詞小院新涼花底坐風吹鬢影對談詩
雲都寺云結茅雲外看雲生雲去人閒雨復晴滿院西風
黃葉下僧房時有落棋聲樹作濤聲瀑作雷須臾雲捲萬
峰開蒼蒼一縷松花徑僧背蒲團說偈回石書游西湖過

虎邱登黃鶴樓觀大江岳陽樓觀洞庭湖得江山之助詩
愈豪放登澄海樓望海一篇尤爲傑作人海卅年何擾擾
使人不得開懷抱忽然萬里豁雙眸縹緲飛樓倚天表樓
頭一望空無礙放眼直出青天外茫茫大地果是一稊米
盈天地間一水耳一島一洲一國土百千萬國如棋布想
從彼處望中原亦祇一髮波濤閒日出霞紅光照耀壽頭
出沒金銀山百寶生其中日月出其裏不知日月之外更
有幾萬里眼光到處青濛濛我欲御風徑造咸池東快觀
蒼蒼盡處畢竟是何物捫參懸井遊蒼穹一杯復一杯鈞
天樂奏天風來龍吟鼉吼震山谷洪鐘巨磬聲如雷此時

快意世未有醉中把筆龍蛇走筆濡蛟宮水把酒問青天
瀕洞巨壑無所用何不盡化爲桑田耕田鑿井萬古不能
盡宇宙從此無飢寒蓬瀛方丈徒步逕可到神仙與我常
往還何用雲濤烟浪隔洶湧禁使不得通人烟不然海水
盡變爲酒泉招邀自古詩狂酒客痛飲千萬年一消從來
愁窮抑鬱同登仙胡爲乎無邊無底徒爲萬怪窟宅蛟龍
淵擲筆狂吟風颯颯顧影飄然愁獨立憶我平生汗漫游
東歷三齊南百粵曾浮海舶浴日亭更觀海市蓬萊閣天
公有意教看遼海山浮家榆塞非飄泊非飄泊且流連世
閒何者非夢幻往古來今惟有海水空連天大笑世人醒

齷齪寰中蠅營蝸鬥情難窮井蛙眼光如豆大何不來觀
大海開心胸吁嗟乎何不來觀大海開心胸船山評云無
一句非吾意中所欲言無一字爲吾筆下所能有其推服
如此嘗驅車過里門訪先君荀年十六初學爲文持以就
正謬蒙許可迄今風采如在目也

安徽定遠方有堂先生積以四川縣令歷官至方伯刻有
敬恕堂詩集平定教匪身習戎旅故軍中紀事爲多在建
昌時奉 命討涼山生番山多死沱白晝陰霾作雷雨連
日不得進爲文以檄之遂齎折多山途中有詩云又向諸
峯頂上行據鞍殘夢恰纔醒日將出海先騰赤山到摩天

不辨青晴雪四圍新玉堵穹廬萬點小龍庭翳空毒霧驅
全盡絕徼神祇也効靈陶雲汀先生題其集云專闢詩王
國居然擁百城文章餘古氣經濟稱時名字外猶鋒露軍
中紀製橫從來請纓志未許薄書生

王華外和中昂子溫江諸生少年隨父任值大府取道新
淦使治候館執卷坐家人關白一切領之而已供張未備
一人入與之談論今古彼此互相駁辯既而悟爲大府微
服入境遽拜謝罪大府扶起書扇一柄相贈謂僚屬曰考
據精確可敬也三十後卽不應試家居教授終日衣冠危
坐讀書常至夜分手抄周易數過性至孝年逾古稀或萱

堂不悅則長跼膝前必色霽乃起詩多散失中途晚霽云
撲面飛沙驟雨過虹橋掩映漾微波夕陽景色天然畫樹
靜無聲鳥自歌翳翳重陰頃刻無空山雨霽綠蘿蕪眼前
幾曲清流水印出危峰落照圖望青城山云昔日曾登萬
仞巔無邊圖畫望空懸虹飛翠嶂通仙逕鶴舞晴嵐破宿
烟古木榮經千歲雪奇花開遍四時天老人峰畔常相憶
我欲移居學養年

王甯甫鶴年和中弟溫江人乾隆丁酉武科解元黎雅營
守備能用易爻辭斷吉凶製丹丸隨身救人偶一作詩自
謂不工不輕示人送喇嘛入貢云凜冽寒風逼緼袍馬蹄

猶自困塵囂據鞍未若離鞍好入世何如出世高廿載鄉
書勞旅雁一腔心事付霜毫愁栖館舍誰相問淪落元龍
意氣豪和旅館題壁韻云郵亭遙望日西斜卸却征衣便
是家何日萱堂承色笑四時休息話桑麻再遊劉氏園亭
云此地重來興致幽主人愛客意綢繆相攜曲徑尋陳迹
小憩方亭話舊遊幾處竹陰濃入座一畦菊色淡於秋低
徊二十餘年別借問園丁識我不

太平無城嘉慶二年賊匪龍紹周等奄至當是時令尉俱
出有老弱兵五百署教諭魏詩激厲紳士募鄉勇二千築
土牆拆民間樓板柵欄架其上男子皆乘城不足益以五

十以下婦人假以男子冠服佐之三日殺賊二百七十餘人遂解圍去蟻賊蹂兩川履山如邱垤馳突破縣城不畏堅似鐵太平彈丸邑無城更柝隄賊來塵蔽天萬家聲嗚咽令尉俱他出捍禦誰團結守卒僅半千疲病足躓蕘冷官獨慷慨鼓勇膽氣決諄諄諭士民忠義共激切週遭樹門扉樓板縱橫截健婦男衣冠執爨備行列二千子弟兵憤起丹心熱跳盪振臂呼殺賊湯沃雪不謂文弱士一人能提絜微員作干城堂堂樹大節匪徒素鷗張陡然銳氣折三日遂解圍柵中力未竭三軍在作氣畏葸輒傾跌萬人共一心賊匪應早滅又有王贊武署南部令單騎詣賊

壘論降賊呼爲青天羅拜之後賊語鄉民曰不敢犯父母
特欲假道耳王怒率鄉勇二千奮前衝突戰竟日退至富
村驛力屈死之此五年事贊武貴州普安舉人任峩眉令
有政聲

彭昭麟號井南丹稜人樂齋觀察之嗣也爲南江學博教
匪之亂川中在在被兵奉檄禦賊自記匹馬遇賊舍馬而
徒走九十里至城途中所見白骨撐天火光遍地有不忍
見聞者後陞廣東知縣暎咭利將有覬覦限七日使之歸
國詩之所造未及厥考而經濟有過人者紀事云蘖芽秦
豫及荆襄根蔓連延入蜀疆

劉之協倡白逆教蔓延楚豫秦三省蜀匪達州徐添德王

三槐相
繼起

令尹自伸巡遠節將軍難遏虎狼狂

東鄉令張寧陽禦賊被害

連兵東北攻圍急輸粟西南轉運忙畢竟藁街申

國憲

劇憐焚掠太披猖巴山驀地啓兵端白帕蒙頭競揭竿螳

怒祇知當轍易羊顛豈畏觸藩難焚巢計拙氛猶熾駢首

刑如罪豈寬太息左車先抗節不畱老眼見摧殘

達州武舉李遇

春禦賊馬賊
遇伏不屈死

戲酬涂明府陳策云輕裘緩帶徵羊叔說禮

敦詩紀邵公莫笑儒生無勇略最風流處是英雄中秋對

月云千里由來共一輪秋心飛落錦江濱遙知繡幕重簾

外定有倚樓望月人

後陞山東登州同知

南川周石蘭

原名立規

以號爲名乾隆乙卯孝廉改號佛山晚

號佛坡松匡先生長子在文安讀書時見其書法甚工喜
作詩有海天閣詩稿將之武昌畱別季才云欲向江南雲
夢去秋風秋雨久愆期梅花索笑侵霜雪海月窺人又別
離荒徑不忘陶靖節南樓豈盡庾元規懸知楚地思君日
沽酒烟江食鱗時又用前韻畱別蘭舟不來城府猶相憶
况說別須三月期樽裏聖賢姑對酌楚中雲雨惜將離巫
山把棹風生腋黃鶴憑欄月正規回首難忘曾聚處玉蘭
花下仲春時音節雅逸不及多錄佛坡外舅山東卽墨人
張嘯蘇先生名鶴也領解時榜名鈴後改今名同輩推爲
曠代逸才詩古文凌跨一切時藝亦欲上攀震川下追東

皋盧雅雨先生深相推服延課其子去官後往來寒舍與
先大父小山公及松厓先生談讌好自寫詩佛坡亦每侍
側年未弱冠也附錄扶陽勞山觀海懷魯仲連云一粟着
空綠飄然浮我心西風吹萬里秋氣此何深寂寞覘龍睡
窅冥聞鳥音不知天下士何處可追尋土花云天地畱古
色土花分獨偏雨聲涼到骨生氣暈何年菌想蒸巖妙萍
磷聚水圓泥塗豈終辱寶鼎鬱蒼然官建寧同知無子所
有著作盡付佛坡

唐長江主簿賈浪仙墓蘇絳作志云在普安卽今之安岳
也自昔題詩甚多 國朝官此地者亦多題咏郡守沈清

任云深山冷翠微荒塚落斜暉誰哭詩魂瘦空披墓草肥
一官名已悞萬里骨無歸韓孟猶相識知音自古稀邑令
徐觀海云荒草西風裏重來展墓田數奇才最散魂冷骨
應仙奪卷情何急敲詩事偶傳同時聲籍甚芸閣水曹篇
胡步雲云亂山圍四野千載一墳孤夜雨暗榛莽春風叫
鷓鴣文章多阨運官職亦窮途展拜愁何限吟魂識我無
皆閒冷稱題

林西崖方伯儁嘗任榮縣及內江張船山之婦翁也以成
都知府從征西域有軍功陞鹽茶道出臬司至藩憲功名
與方有堂相似幸內江時與默野僧往還僧不自知年歲

亦無名號以其寡言質率呼之爲默野云相傳爲數百歲
貌類四五十歲人是時西崖方伯年方少壯及官鹽茶道
相去已二十年邀默野至署相見方伯髮已頽白而默野
如故在署終日惟啖棗一二枚或飲水少許盤膝默坐夜
則周走室中不休嘉慶七年人尙見之今不知所在矣方
伯順天大興舉人

趙由青江西南豐人嘉慶元年署江安典史人呼爲趙青
天與文士交遊論文談詩風雅宜人去之日歌詩送別者
甚眾亦有畱別詩三章有句云閒官爛熟公安句矮屋酣
吟子美篇浪裏船過堪載石腰間囊匱只畱詩又口號云

好友華箋贈吟來却過情數詩雖奉答兩意更相縈春樹
迢遙想江雲淡漠生飄然憐一別重會到江城

劉鎮臺清貴州廣順州拔貢嘉慶二年教匪滋事爲東鄉
令入賊營招降賊呼爲劉青天欵以酒食後陞忠州牧歷
陞知府賊近巴州率鄉勇直攻賊營賊驚走六年陞建昌
道加按察使銜七年賊平陞山東鹽運司教匪破定陶縣
有髡山賊據之公請于撫軍曰寇聚此將圖大舉宜乘未
發擊之願披甲爲士卒先撫軍猶豫公曰兵貴神速若待
外兵外兵集賊亦集今賊大勢在滑山東特其游兵所以
阻我進討也失今不擊賊必趨衛輝入太行爲巢穴山東

荒旱盜賊蜂起相應難爲力矣乃決計破賊官兵初出賊
大笑步兵以長鎗刺陳馬兵繼之有識運司者曰此劉青
天何可當也遂潰屢勝復定陶十月大風雪兵銜枚疾走
平旦運司先至賊築土牆外樹雜木毀垣而入順風擲火
烟焰蔽天賊大敗 上諭屢次褒嘉賜詩云循吏清名遠
邇傳蜀民何幸見青天誠心到處能和眾本性從來不愛
錢有守有爲績昭著無偏無欲志貞堅空羣羨爾超流俗
明慎咸中治理宣賞布政司銜先換頂帶事平自請改武
職爲國効力授登州總鎮以文改武漢人未有也嘗見其
公子布衣布履人不知其爲貴介

唐樂字堯春綿竹人乾隆丙戌進士吏部主事官貴州平
越府知府有子七人辛酉一科兩孝廉一副榜一拔貢人
稱其教有義方後多知名士李雨村序其詩謂其學西崑
體落花云滿目蒼涼起暮烟閒庭空濶倍淒然珠圍翠繞
無多日粉碎香消又一年夢斷梨雲驚幻蝶魂歸苑露怨
啼鵲枝頭在結同心約撩亂春情總夙緣蕭條風雨惱黃
昏斜捲珠簾獨掩門玉笛吹傷遷客意驪歌驚散美人魂
香辭紙帳心初冷影謝銅餅膽不溫夜月溶溶愁更絕闌
干倚遍懶開尊初夏道中牛背橫吹短笛風山陰流翠雨
空濛圍棋賭墅狂何劇涉徇尋花興不窮細路秧侵新漲

緣踈籬繭煑暮燈紅田家止客娛雞黍一笑仙源咫尺通
牛頭山何處碾山雷怒集銀濤噴薄酣戰急深林奇鬼瞰
行人古樹杈枒當道立蕭蕭落木捲地來腸斷元猿清晝
泣驕馬躊躇慘不前朔風吹雨山城溼朝天關門聽奔雷
百折灘峻嶒峭閣俯江干戍旗落日關山迴鈴鐸西風草
樹寒烟外帆檣通廣漢雲中宮闕望長安題詩莫漫愁孤
絕千古魂消蜀道難寧羌州雨雪回首家山望不真瀟瀟
風雨伴行人青驄苦耐閒金勒紅友相邀踏玉塵劒閣雲
沉迷旅雁嘉陵水淺凍文鱗驚開古驛梅花好誰折寒香
奇早春瑰麗雄奇不徒以色澤爭豔也

閩人張熙庚號乃庭從征廓爾喀平教匪亦在軍營入黔
入楚經歷戎行最久署綿竹擢郡丞陞州牧屢蹶復起有
窗下草宦遊草襄城卽景萬方輻輳大河東雲影天光望
眼中一水護城新漲綠千村如燒晚楓紅詩從疎雨微雲
得客有輕裘緩帶風自笑戎衣慵攬勝行行且策五花驄

軍營中秘奉制府札調回川武端山下返征鞍自襄陽開調杯

酒郵亭興未闌大地山河皆北向何人鬼域尚南冠余卸審錄

後臨行時猶有楚匪束縛待質者氣聯秦豫三方肅均州爲三省交衢時各有警備威撼

瀟湘九月寒爲語臨歧諸猛士飛鴻早送凱聲歡錦城除
夕八千餘路隔江關又逐春光到此間度歲客中還是客

望雲山外復層山辛盤柏酒寒更夢茅店雞聲半日間

是日

在寓却清

遙想近臣應待漏來朝有喜自

天顏

庚戌元旦皇

閒無事

上八旬萬壽是日頒發恩詔

東臺催餉輕身飛度萬山巔輓得芻糧好

着鞭增竈幾人能宿飽連營十里待炊烟據鞍草檄殘陽
道趼足傳符向曙天但使三軍可朝食莫辭况瘁且爭先
從軍之難如是

山陰沈楫號庚軒嗜酒耽吟醉後露頂跣足揮毫千言初
習舉子業屢困場屋乃就職州同從軍西域爲方有堂方
伯器重每相唱酬歷險阨二十餘年得補縣令有存存堂
詩集楊蓉裳爲作序刻於嘉慶壬申抵鎮龍關有婦人爲

賊所殺子幼不知枕屍而啼愴焉作詩傷哉鎮龍關小醜
肆剪屠川北半蹂躪此地尤彫枯白骨橫戰壘山空但啼
烏溪畔一婦死受創無完膚旁有數歲兒伏屍尙連呼見
之慘心目生民究何辜彼蒼豈不仁浩劫如是夫流涕慰
孤兒告以母不蘇策馬舍之去陰雲密前途宿飛龍關夜
半聞鬼哭雄關彫瘠鬼爲隣碧血三年灑戰塵故鬼方號
新鬼續寒衣猶自寄征人夜過小尖山紀事一篇足見幹
濟人多以酒狂風漢日庚軒不知庚軒者也序云戊午歲
杪奉勒公帥檄飭運餉三十萬至渠達之間隔山見賊黨
數千蜂擁而至鄉兵役夫駭絕欲遁山畔有若爲威勤伯

勒舊駐兵所因厝餉於砦集夫役而諭之曰賊與我祇隔數里一驚擾則賊知我無備若輩卽棄餉遁亦不免眾泣曰柰何余曰天且晚賊未知我虛實若輩從我則俱生不從則俱死我以身殉不能爲若輩計也眾曰諾乃選鄉兵十數人使各立幟於嶺後役夫刈草焚於林木叢雜中凡十餘處望之若竈賊疑有伏果不敢逼乘夜出山溝負餉蟻行而度賊踞山左右岩昏夜見人行不敢下但以鎗礮下擊終夜不絕聲而余所率兵役已負餉馳六十里抵達縣南關矣其焚草於叢莽中者先誠之曰火盡復燃將曉卽逸賊疑懼終夜比明來攻虛無一人軍餉無遺兵役慶

更生焉詩以紀之凍雲霾空村于役迫殘臘環山賊氛熾
殺氣滿岩峽役夫色慘栗相顧膽惟怯豹虎值千羣性命
輕一葉死地而能生樞機在倉睫進或可倖全退實無生
法播薪作疑兵旌旗滿林插昏黑山礪行違計路廣狹迥
危一綫緣石峭兩崖夾前驅趾屢審後涉響輕答慮險復
慮兵入柙還出柙昧旦登翠屏達縣山名喜見成樓塔百夫慶
生全有酒始能呷回望小尖山毒霧尙匝匝驚定知曉寒
西風吹颯颯

王爾鑑河南盧氏進士乾隆閒知四川營山縣調巴縣後
陞知府能吏也決獄有神明之稱登忠州北城樓遠眺詩

奔走三十載到處貪溪山臨江今至止面面溪山環此日
登樓一四眺盪胸決皆開心顏山城蜿蜒傍山起大江環
抱山之趾飛閣危樓層疊然人家都在烟霞裏竹琅玕兮
樹森森飛飛雉堞凌嶷嶽屏風嵐翠溼我衣鳴玉溪聲助
我吟憑欄俯仰弔今古昔有哲人撫茲土當年心血沁人
心至今霏霏灑靈雨四賢祠圯湮草萊獨遺宣墓對巴臺
陵谷變遷典型在凝眸仰止頻低徊大江東走杆關去西
望玉山控雲樹巴蜀要害鎖夔門臨江爲扼中權路山鬼
嘯雨猩啼烟前有譚賊後有陳逆出沒跳梁溪碕間因俗化愚愚不
驚鎮撫蠻獠方安眠烟消雨霽歸鳥有曠覽溪山傾斗酒

高吟欲續竹枝歌東坡東澗種花柳遊鄧都大峯門山題
詩云兩山峯之堙石磴穿雲通雲穿儼有門闔闢來天風
繫馬一登眺聳身入雲峯舉足懸澗壑昂首凌蒼穹松濤
響天籟襲袂香融融歛爾溪山斷白雲界西東雲復屯萬
壑渾沌藏洪濛風門風一噫千山白雲空

毛海客大瀛江蘇寶山人惠瑤圍制軍招入幕府從軍西
藏以功補潼川府經歷陞中江令牧簡州乾隆五十七年
教匪渡潼江走金堂海客恐入州境率營弁馬應魁督團
勇二百人往禦遇賊于土橋溝戰歿婁江姚方伯令儀與
之素好爲序其戲鷗居詩鈔海客遊幕吾鄉最久諸名勝

皆有題咏錄其在蜀者雲陽一詩足資掌故序云雲陽張桓侯廟在江之南飛鳳山之右門北向與北岸城恰相對傳侯歿後其首沿江而下至此不流土人得之建祠虔祀奉其首置爐中以香油浸之得不壞像則肖其貌以塑故能逼真非天下廟宇塑像比嘉慶二年六月白蓮教至雲陽焚燒城郭適穆軍門帶兵至桓侯廟前以巨礮轟擊賊卽散去嗚呼是非侯之靈有以默助之歟余於十一月二十四日由萬縣至雲陽訪梁明府敦懷置酒相款席閒道桓侯事甚悉別後卽放棹南岸謁侯廟見侯狀貌雄猛面微帶青黑色果不類世之像祀者詢廟僧以首之所在則

云貯像腹中諺有首在雲陽身在閬中之說洵非無據明
陳文燭詩傳說頭顱曾此葬可知肝膽更誰憐亦指此事
因作詩以記之鳳山山色鬱峻岫廟祀桓侯像最真門外
大江趨白帝城頭羣盜散黃巾莊嚴劔珮猶存漢颯爽鬚
眉若有神安得蛇矛橫掃處一時楚蜀颯風塵夔州寓館
作夔府孤城野色昏烽烟未靖欲消魂水連魚腹通瞿峽
山關蠶叢控蜀門此日飄零嗟杜甫當年割據笑公孫居
人指點塵兵處白蓮教屢犯郡城至
今鄉勇屯守不輟郊外猶多列戍屯建
南觀察徐玉崖先生得請告歸以詩畱別川中同好屬蒙
惠寄索余贈詩寄呈卽以送別昔年萬里下峩岷今日扁

舟向海濱不與黃花爭晚節思從白社託閒身沈黎舊澤
畱棠菱昌衛浮蹤感塞塵短劔長鏡分兩境不須枵觸憶
前因回首風塵暗廣都杜鵑聲裏促歸途三休高寄王官
谷一曲幽尋賀監湖尚有俸錢償酒債每攜行篋了詩連
七千里外飄然去錦水巴山入夢無

程尙濂浙江永康人乾隆甲午舉人嘉慶元年署青神縣
事著有心吾子詩集吳穀人錫麒爲之序野寺中避雨云
崎嶇更陰雨野寺欲黃昏泉架斜穿屋風簾亂打門烟巒
罨來逕燈火盼前村何處猿聲苦悵然紫旅魂棧中旅宿
步月至一野人家甚幽邃口占一律贈之巖翠擁山莊松

陰度石梁臥雲藤枕滑踏月筍鞵涼食漉新篘酒囊儲舊
驗方颺輪搖大扇鎮日坐繩牀初至成都督學使者吳少
甫先生適以秩滿復命蒙示錦城畱別詩次韻奉答兼

寄吳穀人太史王葑町給諫兩先生馬蹄西上萬重山鄉
思驚心鴈北還不信險從天地設祇疑身在畫圖閒千盤
鳥道魂猶悸一枕鷗波夢亦慳差喜風光同故里花陰時
聽哢綿蠻么麼猶自煽欃槍楚尾吳頭道路長羽檄西馳
通隴蜀音書南望滯江鄉車前螳臂誠何益井底鼃聲莫
漫狂恨不請纓爭敵愾徑修矛甲事戎行趙蘆洲刺史以
遊資州甘露寺八景詩及龍洞記見示八景之目曰甘露

門曰界泉曰龍洞曰鳳山曰珠江曰金帶橋曰篔簹谷曰
眾妙峯亦曰松峯各誌以詩魁奇磊落諸體咸備嗣復借
艾春巖明府重遊時值秋仲古桂一株郁烈異常大可合
抱數千年物也春巖復增入天香岩一景賦九言一章紀
之其龍洞一記鏗幽鑿險直窮人跡不到之境而筆力奇
峭亦與山水爭勝洵濟勝佳話也爲賦長句題後我聞甘
露寺屹立珠江泉界泉飛落九天外驚淙劈破青山腰下
有龍洞闕深黑上有鳳山側翹如欲凌風翺江流何鱗鱗
束以金帶橋篔簹萬箇綠無縫空翠直壓松峯高又聞中
有千年連蠶桂之樹天香十里五里隨風飄或云此卽萇

宏讀書處想見吟聲鏗憂鏘雲璈亦有山風子淋漓醉墨
題巖嗽謝公屐齒不可以徑到穹崖絕壁歷千百載誰鏤
雕蘆洲先生老詩伯腕力不許山靈逃銘金削鐵筆如鑄
遂令奇巒怪石飛流絕壑一一刻劃窮秋毫春巖復綴以
長句碧波千頃雲滔滔嗟嗟名山遠墮荒微外詩人不見
空餘樵牧相嬉遨不然煙荒草蔓一碧渺無際噓風嘯月
往往深夜來山魘要知奇蹟不可祕如玉在璞寧終韜一
朝神物徹靈界勁弩出箠已離發奇人奇境兩相值神鏤
天劃森若列宿羅秋霄我思古之臥遊者坐嘯一室能使
山水來相朝豈知摩詰詩中更有畫髣髴千巖萬壑雜沓

浮生綃我讀此詩不須更攜綠玉杖但見仙人舉手天半
遙相招

北平鄭觀察成基號靜山有東園詩集其在川有入蜀吟
籌邊魚通詩稿續稿綏山籌邊詩稿皆關夷務者嘗從軍
剿瞻對夷匪禦峩邊夷匪爲建昌道時事也當教匪滋擾
由荆湘溯三峽通夔巫軍書旁午均有詩紀事送雅河鮑
魚於方伯董觀橋詩云雅安城外雅河水蒙山山下平羌
渡中有怪魚形如鮎四脚紛拏啼上樹去年憶在錦官時
曾爲方伯道其故歸值殘臘碧波寒每囑罟師無覓處東
風又見桃花開塞嶺雪消春水來驟雨連朝滿郊野灘聲

昨夜響如雷漁人舉網欣如願圍如巨竹長尺半飛書特
寄芙蓉城幸不吝言博一粲別君四月驚彈指離緒千端
殊不已題詩並誌企慕懷但覺相思情滿紙聞董方伯初
任蜀藩邀制府飲先啓云職陞見時面奏蜀地風俗奢
靡願厲以節儉當自職始欲治具奉邀無珍錯無多品未
知肯賜顧否制府許焉至則魚肉菜蔬僅五器制府爲之
歡然一飽當時兩賢之董公名教增江蘇上元人 欽賜
舉人探花及第制府一等威勤公勒公保也鮑魚俗名娃
娃魚有四足能上樹作兒啼觀察以十餘萬金置產業所
築館舍亦宏厥歿後蕩然余曾寓居其第已兩易主矣後

人不知所往

張懷浦懷泗之弟號雨山尤工詩曩曩生新七古矯健具
馳驟變化之奇望太華云碧落劃然開天外三峯湧氣壓
黃河騎勢拔終南從羣仙抗手迎茅龍乍可擁潼關云匹
馬青天上三秦氣象多關門開太華山勢截黃河百二形
如此熊羆守若何時清烽燧息翻笑太嵯峨著有十笏山
房詩鈔七古尤多傑作篇長不具錄楊蓉裳寄書云於涂
生中達昆季處見先生五七言古檄掖雲氣曩鏗金石奇
響擲地高言軋霄欲以舊稿就正傾倒至矣

周載軒侍御有蜀遊草空舫峽憶阮亭論詩絕句一首先

生詩思在空舫冷雁哀猿幾度聽我最有情秋又老斷雲
衰草一舟停訪少陵萬丈樓卽用公白帝城最高樓原韻
弔公遺跡慰公愁萬丈光芒萬古樓卽最高樓遺址久客自甘詩
裏住何人敢再蜀中遊山從太白橫天亘江落岷源到海
流生面獨公開不盡月明雲淨女牆頭夔府云白鹽赤甲
仍雄鎮七鎖三鉤舊捍關瀕洞風塵千載後昇平歲月一
舟閒層城樹掩霜前碧野岸花飛雨外殷西蜀地形今到
此臥龍山共相公山侍御來蜀與補山節相孫公唱和節
相上元張燈設筵首唱侍御和以長篇不具錄載軒名厚

轅

嘉慶年間川中教匪徐添德冉添元王三槐之亂一婦爲賊得縛馬上欲污之婦曰欲妻我須令我沐浴梳粧許之粧畢賊喜就之婦以梳扼其喉斃之乃脫衣衣賊以巾纏飾其首已服男子衣遁去又一婦甚艷罵賊不屈賊斷其首擲溝中去後婦首忽自合更生但首偏頸圍紅線一道以壽終有黃廷鑑者與賊鬥刃刺其喉尸三日不仆有湘潭賈客某入蜀頗得貲財娶婦余姓甚美後賈客卒有一惡少強欲娶之婦佯應以爲送吾夫至湘覩其葬卽以身從矣少年以爲實隨之行及至楚爲之買地營葬葬畢列而死人以其故告攸縣陳蘭莊屬爲詩以表彰之蘭

莊應聲曰吾已得四語矣青春送白骨萬里一身單知有
湘妃怨寧辭蜀道難厥後欲續成之不得倩同人代續之
終不佳見聶蓉峯詩話

惠制軍瑤圃先生齡正白旗姓碧魯乾隆五十六年任川
督有詩集刻於湖北西藏用兵爲叅贊將返湖北畱別幕
友有句云萍蓬漂泊知何定動我澄江萬里愁又云何時
再訪磯頭鶴相與同澆濁酒杯先是嘗于役天津夢至一
處若行署有老嫗扶少嫗啼泣詰之嫗云嫗昨爲強暴劫
去主人尋歸官疑其與盜有私訊之無有也嫗病且渴制
軍覓漿飲之去俄見嫗持姬自寫小照一軸來云謝勺水

之惠諦視若生並記其姓名有楊汾夢雨圖周厚轅題之
云津門楊柳青復青穿花蝶蝶來窗船邀人一枕遊仙去
烟消雨霽風初停帶雨梨花委臺榭背面傷春惜春嫁前
宵犬吠劫花飛此日鶯啼泣閑謝人生難遇多情者緩急
相逢更相捨孰教甘露許人嘗故應真面爲公寫是真是
假假卽真漫將陳迹問前因知公沉滙流甘處已遍川原
望澤人

前任甘肅西寧道雒松亭昂重慶巴縣人本姓蕭幼時在
雒家遂從其姓父有圖章與諸舖約爲符信取貨物父病
委掌家務松亭磊落豪爽揮金不惜久之恐父察核見責

攜貲潛至京遊同鄉官某所有平賊方略數條欲奏聞而遲疑未決松亭膽氣壯獨取其說上之發回軍營効力時嘉慶四年也以軍功授漢陰別駕嗣擒獲首逆張士雲擢邠州牧後爲荊州知府四川由水路進京所必經之地凡計偕北上者無不資助同鄉仕宦經此行李供其匱乏以事過里門載布一船平日有一面之識無不周也於是人號之曰雒荊州兄某承蕭嗣者亦爲知縣松亭買書貯錦江東川書院捐貲生息爲會試旅費子本源戶部郎中承源雲南路南知州

臨邛張本元自詡善針有張氏難產適本元至命取婦褻

衣一履一加以箕口吐針針之嚙曰產時兒頂上有針孔須泥之既產果然或病在頭針足癆病針背無不立愈其針或長尺或數寸約計七十餘用則取諸口中言笑飲食如常或傳明季避亂山中有老猿授以此技

齊二爲湖北教匪被誅姚之富齊國謨推其妻爲帥白旗大書爲夫報仇自楚入川屢抗官兵齊二寡婦之名大噪與王三槐等相犄角往來擾川及陝婦頗豔冶輕狡善騎射掠良家子女秀麗者三四百裝束略與已等馳馬追逐令人倉卒莫辨一日戰敗馬蹶墜地官軍大喜喝令生擒一武弁爭首功下馬將近婦揮刀斫斃一武弁繼至又揮

刀死之復騰躍上馬疾馳而逸其狡捷如此後勢窘墜岩而死張船山詩云嫠也橫行起禍胎桃花馬上看重來不貽巾幗先逢怒欲辨雌雄已自猜黃鵠特翻貞女調白蓮都爲美人開請纓便是秦良玉可惜征苗失此材

朱射斗貴州貴陽人平緬甸爲傅忠勇公所知積功至總鎮四川敎匪之變戰績最著夙爲賊所憚經略倚之如左右手勒公被罪去總督魁失防嘉陵江賊偷渡鋒銳甚檄朱來剿兵行千里喘汗未息直博賊壘賊眾我寡圍之數重手刃數人而死全軍盡覆兵民爲之奪氣時嘉慶五年也張西村乃孚作詩弔之云黑雲渡江江水流江花江柳

俱含愁壯士荷戈夜僵立風鏖刺骨聲颼颼去年賊燒雲
門鎖飲馬不敢窺江頭自古長江限天塹飛渡豈聽人爲
謀有河如帶當干櫓有將如虎作砥柱天險人和果足憑
鼠子縱橫莫余侮豈知晏安撤藩籬石沱潛渡逞餘怒烽
火萬家委賊巢新鬼啾啾青燐聚羽書星夜馳軍營七日
師行三十程淮陰囊沙無人用條侯堅壁先自驚可憐倉
卒談兵者猶說持重推老成檄召一軍衝前敵牽制機宜
難奏績老虎巖前殺氣多赤霧滿天白日匿直探虎穴取
虎子蟻聚蜂屯勢相逼持矛瞋目殺多人後勁不繼空太
息我今不死非英雄遺恨未滅此朝食屍橫撐距淚闌干

烏鳶啄肉不忍看一時從死千餘輩
蒼宏血染土花斑七年轉戰秦楚路
藁砧從未唱刀環鴻溝已失嘉陵險
西南健將旋凋殘涪水無情自東去
殘鴉落日潼川樹招魂無人埋蘚碑
牂牁銅鼓歸何處嗚呼材官鐵騎看
如雲一身擁衛徒紛紛落星偏爲太
將兆當日陷陣何無人至今惟說朱
將軍

東鄉人羅思舉有膽智膂力過人趨
捷如飛不治生產橫行鄉里閒觸禁
網屢陷屢脫鄉里畏避久益不知所往
時或見於人家屋瓦上及幽崑遠洞
荒寺敗舍閒足嘗裹鐵砂數十斤蓬
頭敝衲行千里外年少爲匪人所誘
後聞其

人在晉往尋刺殺其人官至大帥歷言平生不諱每臨陣
身先士卒見武弁有迴首避鎗炮者深恥之曰吾輩願死
沙場恐不得何爲畏避也其所見遠大如此龍駒蹀躞不
受絆萬里方看流血汗銜轡控馭無王良坐使雄駿低首
嘆蹠跣不羈彼何人屢觸禁網幾殺身足裏鐵砂疾如鳥
蓬頭敝褲目有神孤棲岩洞無安處拚死溝壑逐飛塵不
屑乘亂從寇盜却歸鄉土禦強暴拔出稠人艾將軍副將
艾公
識其才使
燒賊營服君侷儻氣桀驁夜半孤身入敵營烈焰一然
聞鼓噪風狂月黑萬竅號旗焚槍棄眾顛倒隱身馬腹隨
奔騰回視火星飛萬道從此賊匪識姓名遙望旗幟孰敢

迎匹馬闖出一敵萬膽大如斗心亦驚

賊匪冉添元當年心黑重六斤

擊劒爲豪俠椎埋少年鬥狡捷父老患苦皆避藏高冠腐
儒遭迫脅誰知身登大將壇殺人如草成勳業金龍後起
然餘灰

趙金龍亦習白蓮教滋事羅平之

平定亦復仗奇才兩雄崛起彈

丸邑

羅與桂俱東鄉鄉勇

駿烈英風每溯洞鵬飛摩天鯨跋海雪浪

倒捲錦雲開從今流品漫疑猜巍巍且築黃金臺高歌大
風猛士來

忠武侯楊時齋遇春屢立戰功婦孺知名賊畏之謂之楊
鬚子其弟初鎮山東兗州公自都至友人何瀛槎爲泗水
學博隨眾往迎侯面微赤白鬚鬱然下馬握手步行入城

其弟隨至公館侯曰吾專爲伊來陛見時面奏伊不勝重任 聖恩不允命來訓飭謂其弟曰汝一介武夫有何識見諸先生讀聖賢書明理必虛心受教卽今日拜師命之行禮功高而不矜官尊而自卑言出至誠卽此一端知其可爲大將矣孫瘦石有楊時齋軍門殺賊歌將軍將軍鬚如戟楊難當邪楊無敵挽強三十膽橫軀智囊早裕兵戎策鎡與公同鄉曾識公面目虎頭燕頤似班超萬里封侯飛食肉破敵功成百戰酣倚天長劍擁鮫函 帝謂北門需寇準無端蟻賊滿河南車攻肅肅星言駕金鼓弓刀出寧夏許國重縣報 主心天山特重將軍射落日風聲生

大纛赤雲如幕捲平麓黑月橫生斫陣心先登上將搴旗
獨霜飛鐵甲重門火咤叱風雷萬人裏一騎飛騰入陣中
將軍見賊不見我狹巷殺人如刈草十丈旌竿馬前倒諸
將讐從壁上觀刀光練接游龍掃歸來殺氣尙從橫血染
征袍怒未平褒公臨陣誇神勇充國防邊景大名薤莠安
良在威克沫邦從此干戈戢笳鼓還朝馬上歌旌旗特壯
終南色丹青閣上畫麒麟髯也將軍果絕倫淋漓誰握如
椽筆一繼班揚頌此人

威遠令李青峯南暉甘肅舉人以理學自任著有慎思錄
十二卷自書一則刻石云天地無可圖報只是勉力爲善

聖賢無可圖報只是反己自修朝廷無可圖報只是循分
盡職祖父無可圖報只是守身教子爲政愛民修築石城
以病歸乾隆四十九年逆回不靖登城罵賊論以大義城
破率家人巷戰死贈太常寺卿可謂不負所學矣詩亦蒼
老題朝天峽云呼吸風雲近人從天路行山光低鳥道水
氣湧江聲改步千峯異大觀萬壑平可能通帝座自此向
神京高洞瀑布云清溪出遙山汎然行眾壑紆鬱及高巖
氣勢忽軒躍頽峽扼危岑飛流亘碧落冥想際元空靈機
參橐籥况乃秋水生怒雲如不約匹練自高寒秋意滿林

薄

桂天聰東鄉國學生以正直聞鄉里有子曰涵精悍多智好舞刀奪槊跳蕩不羈賊起或誘之從逆涵手格殺之父
子率族隣日與賊持賊焚其廬營罐子山賊數萬來攻涵
率數十人大呼躍出賊辟易奔又嘗從官兵出遇賊官兵
潰涵率其眾伏林莽賊過疾擊其後轉大勝會日暮札叢
山伐草樹燃火數萬賊知涵人少意其虛張聲勢夜半往
劫入營不見一人忽鼓聲四面起如百萬軍賊亂奔出歸
路已塞自相踐殺至天明仍不見一人蓋涵料賊必至與
數十人者散伏四山伺賊入營卽以木石斷路虛作聲勢
而已周篁村云桂提臺涵非徒勇智亦絕人有某賊爲官

軍所獲縛於轅門將斬矣桂自外來賊求貸死桂曰當時
勸汝莫爲今何如賊曰果肯救必改行爲國効力桂令設
誓乃稟帥請釋許之桂令某返招降諸賊至期不返桂選
壯丁五百以往時賊連營四十里直入賊壘挾以俱出卒
得其死力某仕至叅將又言在某地爲賊斷餉二日不食
經略勒公令拔營走渠縣士卒無應者明晨桂請帥上馬
啓行勒恐兵不從桂固請行提轡以出至門執令旗呼將
軍令拔營勿遲一卒曰不食二日安能行桂拔劍斬之又
一卒怒曰不給軍糧尙殺人耶又斬之遂無敢言見帳房
移動者數矣遂促勒公行合營隨之無敢後其敢決如此

莫道草澤無英雄奪槊舞刀疾如風爭先跳蕩麥鐵杖負

氣跋扈周盤龍有才莫展甘落拓劔氣夜燭牛斗紅此際

兩川豺狼起

嘉慶元年教匪徐添德起達州王三槐冷添祿等起東鄉應之

破邑攻城焚

村市婦子號泣何方逃亂民從賊勢莫止奮臂決起桂將

軍將軍村中匹夫耳奸細來誘進甘言將軍裂眦立誅死

團集鄉隣獨當先率數十人敗數千左右官軍屢殺賊鼠

子奔竄散如烟偶陷重圍敵競進匹馬橫貫無堅陣有時

閒道出奇兵從天降下揮白刃頭顱紛落血亂飛併歸黃

泉不及瞬

將軍每戰手斬一二百人

累功手握大將符深謀非仗膽氣

粗掃蕩羣兇靖疆宇坐鎮百蠻敢支吾吁嗟奇才不世出

貧賤白眼遭擲掄縱酒豪歌無所事槁項黃馘老農夫

桂

門號

養齋

陳郁度名夔讓涪州孝廉父名朝書兄弟朝易朝詩三人
同時爲縣令有廉聲其家常食粥有一門三知縣日日喫
粥飯之謠郁度出知建安與張船山最交厚家藏船山畫
一白猿坐怪石上題一絕云青紅山果不成林峽古江寒
夜雨深誰與此公論劍術相看多少故鄉心自記云余與
郁度同年俱有猿彘之性都門話別作此贈之詩亦不載
集中荀侍先嚴見郁度酣飲高歌放達不羈後陞永春直

隸州知州

女子有才福命每薄非終身坎壈卽青年居孀歷驗甚多
然以節傳亦不幸中之幸而文墨尤足傳其節也榮縣楊
氏監生楊鳴皋女龔元棟妻年十六于歸三載元棟歿僅
遺一女撫子紹宗成立氏知書子及四孫詩書皆其口授
嘗自賦苦節詩云兩世冰霜苦一身慈孝擔奉盤復畫荻
隻影愧難堪傳此一首茹冰三十餘年苦節可貞詩之工
拙非所論也

江督陶雲汀先生澍嘉慶庚午典蜀試副之者吾東史松
軒也二人皆編修前王漁洋鄭次公來川時皆部郎漁洋
蜀道驛程記詳于山川名蹟有裨風雅雲汀蜀輜日記喜

談阨塞險要足資戰守後來一从官侍從以詞章顯一屢
任封疆以功名著二人志趣已先見于此矣雲汀沿路有
詩名皇華草其紀川中風土者寄題秦良玉舊樓序云樓
在石砭廳署後凡三層中層良玉所居今設像以祀所用

白桿兵尚存忠州女子天下奇父是秀才

良玉父名葵
忠州明經

夫

土司天生智勇不世出坐令巾幗慚鬚眉詞翰淹通意嫻
雅錦袍艷照桃花馬天子臨朝識姓名請纓獨對平臺下
白桿之兵銳無前巨寇親擒射場天弟兄死國身許國平
生忠義何皎然陸知州誠可恥肉眼不識奇女子抽刀斷
袖應羞死邵捷春亦庸才坐受屠戮吁可哀吾謀不用竟

如此嗚呼羣鼠真來哉夔門已失關塞黑忍使此身重事
賊閉關坐臥小樓中大節直同文相國何須更論洗夫人
多少麟臺愧顏色巫山女子善笛將嫁之夕隣女羣集吹
以送別爲作巫山月巫山女兒艷如雪雙鬟巧作同心結
踏花從未越香溪少小焉能識離別東家昨夜聘錢來百
輛門前羞欲發陽臺咫尺覩行雲欲問分明口難說西隣
女伴亦嬌嬈短簫爲試唇邊鐵含情默語如琵琶一聲吹
裂關山月空江應有臥聽人遙夜孤篷霜欲白轡軒日記
史松軒爲作序時閱數年矣雲汀觀察東川又詳加考訂
名人一書成之不易如是松軒名評

江西南豐譚子受光祐以通判來川陞同知編纂四川通志工詩嘗得古鐵簫一枝遂以鐵簫名其集在京作春帖子詞亦竹枝類也如願前頭手一卮青裙翠鈿也相宜笑將頭上銀旛摘隨意曼成方勝兒綠衫楚楚拜新年嬌小村姑態亦妍摘得山花堆翠髻貴家門榜看燈聯子受在京曾作英雄兒女圖及屯田新疆攜眷以往作詩送之者多以此爲言亦佳話也

後陞湖南寶慶知府

詩人黃姓忘其名亦未詳其里居多與其婦淨因唱和行曉行入峽云山合林深入杳冥松濤隱約走雷霆置身無地雙崖黑仰面看天一線青老樹扶人根作磴深溪走瀑

石如鈴長吟我欲呼山鬼朗誦離騷一卷經寫景如見能手也。

朱子穎工詩善畫有句云一水漲喧人語外亂山青到馬蹄前一時傳誦以其句似太白人呼之爲小青蓮守泰安對太山築晴雪樓卽景作畫後轉運四川袁簡齋贈以詩云愛向蜀江看峽險懶從秦棧叱車回又云莫怪使君風骨冷太山頂上抱雲來吾淄蒲柳泉先生聊齋志異子穎先購得鈔本後乃有刊本盛行于世

嘉慶九年揚州史望之先生致儼視學川中以清嚴得士心王懷曾懷孟兄弟少而知名一時并拔取捐廉修考棚

先生幼慧讀書七行俱下學塾在尊經閣前每夜歸髣髴有二燈在前似導行者抵舍卽不見病中夢關帝降曰汝本玉林生也病遂愈因自號玉林生晚號榕莊老人著有榕莊詩文集嘗送友之粵東作令云爲政先宜除害馬好官不但飲廉泉其操尙可想而知矣

李光謙號搗之直隸任邱人乾隆庚子舉人嘉慶十四年署中江宿案山積陞堂皇視事膳飲皆在公座判決如流數月後案無畱牘無枉無縱頑民受責者亦無不呼青天已補榮昌民赴大府懇畱不可攀輿送者無算有張老人跪呈石碁一奩曰此邑產也小民以此爲業特製以獻公

他日見石如見我邑民也乃泣而受之曰我何德于民眾
皆號泣聲聞數里既至榮昌不攜眷愛才士擇子弟佳者
入署親教之威以夏楚多所成就抑強暴扶良懦其相驗
也單騎從刑件二人一役張蓋不設棚及公案坐胡床問
畢須再審者進城否則立與結案久之訟稀好遊市屢詢
風土問民間疾苦有因事訴者就所在剖決或勸諭息事
往往不經書差不存案百姓競伺其出來質曲直有客請
謁直入書舍無司閤傳簡後陞綿州去任時千百人兩泣
攀送署重慶府告歸商民饋二千金不受越五六年邑人
稔令貧醵八百金送諸其家邑諸生敖廉臣嘗至其處傲

廬蕭然一榻一竈無妻無子如老頭陀嗣族閒一子聞其
孫已舉孝廉矣

聶蓉峯先生銳敏湖南衡山人爲四川學使士慶得師所
刻寄嶽雲齋詩集幾於家傳戶誦先生幼工試帖十二歲
應試張忍齋考古學所取惟先生一人刻其衡南夕望詩
四首佳句如雁迴縈塔影鴉返帶江霞他如燕睇有畫棟
遙相識珠簾近若迷有鳴倉庚有一村紅雨歇三徑翠烟
橫時以館閣人目之乙丑會試未張榜卽自書報條粘寓
邸其學養自信如此歿後蜀中有扶乩者先生降壇問爲
何神云文昌帝君紫衣侍者司人間祿籍鹽源令陳某言

降壇皆運筆書字於紙兼作畫爲之畫龍不點睛請李太白點之果精神百倍荀嘗於京師晤乃弟以孝廉上春官自言通相法謂先生更精斯術云先生豪於飲脫略形迹醉墮冠幘旁若無人吳梅梁先生來川接學使任制府並請之梅梁以前輩禮敬事默不飲酒先生拇戰雷轟輸套杯飲已大醉剩一巨觥飛與梅梁曰碧筒杯大真難飲願有梅梁爲解圍立俟飲乾梅梁勉爲之盡一堂大笑其愛才若命蜀士至今思之

大竹王魯之懷曾小雲懷孟兄弟垂髫應縣試覆考賦梅花不拘體一作七言長古一成五排四十韻令驚喜一時

傳有兩才子之目院試考古安漢將軍歌蓋咏紀信廟也
魯之作七古云城頭一夜鼓聲裂天地蒼茫黯無色楚兵
如山壓漢城纍卵危機在頃刻漢王提劍三尺長呼吸風
雲馳入荒到此神龍一失水重圍坐困空倉皇豈無謀臣
與虎將低首垂頭坐相向當時不有紀將軍誰作漢家真
保障黃屋左纛駕出城漢王降矣脫塹拚將一死詭強
敵爲報君恩敢惜生將軍一死何容易漢四百年留神器
千古崔巍安漢功玩弄重瞳等兒戲時年方十三耳學使
周公系英拔置第一小雲年更少作禱雨詞用東坡先生
起伏龍行原韻亦取前列卽於是歲入泮發放時學使謂

諸生曰汝等均不及二娃子魯之以孝廉補山東安邱令
今調長清望西嶽一篇尤奇警五岳突兀此其頭上有白
帝司清秋下有萬古帝王州外有洪波九曲環之流崑崙
如龍走中國太行掉尾陰山黑看山不看太華山焉知大
勢在西北極北莽莽無人煙中原浩浩平若川黃河飛來
不敢下但見蓮花青插天丹霞何盤盤中有飛天十萬奇
靈官金銀臺出日照耀仙人皆着遠遊冠惟有希夷老子
不肯折胷事少皞長眠其下如龍蟠風吹一鶴下雲端吾
欲從之何乃難紅塵如山壓折骨巨鰲戴之不敢搏人生
不得飛食肉便合攀雲盪心目笑殺北斗韓文公乃在蒼

龍嶺頭哭去去且復遊燕臺再來定當躡龍鹿珠袍玉簡
朝金天胥佩流金火鈴錄明星手摘挽天匏玉女盆頭濯
吾足脚踏芙蓉望大千日月西飛海東綠續娶夫人亦能
詩小雲以孝廉就學博性酒脫不願與秀才較錙銖不久
告歸在京師作小遊仙詩百首略記四首云竭來天上看
紅塵化去沙蟲看不真祇有浮雲還善幻如牛如馬又如
人蕭蕭落葉滿空飛盡是神仙遇劫歸到處喜談天上事
劉安小犬似牛肥千爐萬鼎不知閒採過硃砂占徧山到
此雲山無處着獨畱丹穴在人閒紛紛瑤草與琪花新種
蟠桃近萬家却喚斑龍耕野地靈芝不種種胡麻史望之

先生督學時兄弟補考故事凡補考附三等末望之先生
奇賞之二人俱附一等正場取冠一軍其見賞宗匠如是
兄弟少孤母太孺人工詩賦親教二子成名荀在山左與
魯之相識來川署鄴都命弟薇堂過大竹登堂拜母小雲
猶在今聞歸道山矣奇才不偶爲之太息小雲善書往往
以金購之船山後蜀中詩名盛者推二君焉

曹大令岐山忘其號杭州人家累鉅萬琴棋書畫絲竹歌
舞以及弓矢擊技之事無一不好聘名師于家朝夕學習
素性聰慧無一不精家以中落乃援例捐知縣來川補梓
潼令地當孔道缺本瘠苦而豪侈加故五更起坐背誦釋

氏經天明而譚經者爲之演說盥漱畢臨歐帖百許字隨意作小幅山水或花鳥並皆佳妙早飯後請棋客手談一局靜坐鼓琴出而校射則射師至已而擊刺則拳師至事畢會友作葉子戲燈後設飯左絲右竹前歌後舞二鼓方罷日以爲常無一刻之閒亦無一刻不樂也奔入能品琴尤獨出冠時人問其何由造微與眾迥殊曰無他不過操之熟耳他人按譜下指依曲調絃心有所制動爲法縛吾則心無琴譜而琴隨吾心任意造曲意之所至心忘乎手手忘乎琴神明孤往已亦不知其所以然但如雲行水流無不入妙耳此卽莊子得意忘言得意忘象之旨指與物

化而不以心稽技也進乎道矣第生長華腴人之情僞物之變態皆非所諳尤不喜案牘遂羅計典今其孫方以刑幕遊川云

綦江秀才楊林妻程氏夫亡作絕命詞云十八青衫二十亡紅顏薄命最堪傷人生百歲終歸盡願尾輜車瘞墓旁遂服毒家人灌解得不死因撫姪爲箴承嗣又有郎命已隨冰鏡冷妾心長對玉壺清之句

沈刺史昭興號硯怡嘉興人以三千金買一鼻烟壺壺中刻一蝦蟆張口銜珠仰首向壺嘴倒而視之則明珠無數自口散落正放則眾珠融而爲一仍入蝦蟆之口真異物

也後爲一顯貴得去初硯怡以筆遊幕落拓不偶時總督四川福公康安欲得一記室令人擇賀稟中最佳者得八副親擇其二使首縣函致令寫作並呈惟硯怡中選延聘入署談論丰采拔出流輩福公大喜閱二年勸之捐職縣丞適有軍務於報捷時保舉畱川陞補知縣逆匪之變亦在軍營爲總督勒公所知繼而勒公被劾入京硯怡亦獲戾出口福公爲之道地復得回川後任三臺令以修堰灌田捐金萬兩至今民享其利得陞瀘州累署知府凡有難處之事委之硯怡無不立辦歸田頗饒宦囊爲嗣子湯盡今年八十餘矣

李楚航湘乾隆閒進士山東歷城人初爲英山令後來川
署大邑告歸復來川又署大邑歸以此始亦以此終究未
補缺也父士琛守江寧與袁簡齋交好楚航年幼隨侍遊
隨園云簡齋疎眉廣頰口若懸河嘗指授詩法里居時與
縱談言隨園近聞外層有設茶酒館者作絕句感慨今昔
有漫興七律十首有云正惟名士貪心重越是高僧俗氣
多看透俗情時文亦有空濛烟雨之奇性酒脫好諧謔論
詩文娓娓不倦見者以爲名士風範

江蘇吳縣石琢堂先生蘊玉以鼎元出知重慶加意培植
文風東川書院必親閱課卷獨賞涪州陳新畬伊言每課

必冠軍許爲川中第一人嘉慶辛酉值選拔之歲學使爲探花陳鍾溪先生希曾與琢堂爲同年琢堂意新畬應首選有陳昉者亦涪州人與新畬同族號午垣詩文俱佳字學靈飛經尤爲川中之冠鍾溪以翰苑器之因琢堂特賞新畬故入選及鄉闈榜發新畬果以第一人發解眾論翕然以琢堂先生爲知人士子爭傳誦解元文名噪一時午垣是科亦登鄉薦新畬乙丑進士爲甘肅固原州牧午垣庚辰進士果入詞林鍾溪先生亦自謂賞拔不謬也午垣以字名京師院中諸翰林爭臨其字爲楷式散館時矜重過甚卷被掣收遂改知縣初午垣考館入選應得知縣不

就大挑一等亦知縣也不就志在必入翰林而終爲福鼎
知縣數固不可強哉道光庚子科其子亦登鄉薦石殿撰
陞山東臬司題聯於趵突泉以事去官陳鍾溪十八歲領
解趙鹿泉先生評其文有吐納羣流呼吸萬里之概嘗以
詩二首寄懷張水屋州倅內有句云尙有伊人隔秋水雙
魚煩訊大毛公謂毛海客也其愛才如此刻有樸谷制藝
人名宦祠子孚恩現任都察院左副都御史

蔣作梅廣西臨桂人乾隆間少年登第補南川令與諸友
就論孟中事作諸體文如康子饋藥有啓蘧伯玉使人於
孔子有書請討陳恆有表齊人伐燕有檄其餘銘贊賦頌

諸體俱備極才人狡猾之技第恃才而傲後竟歿于藏中
居官甚嚴藏中夷人爲立祠

王牆東先生汝驥時文小題膾炙人口以貢爲四川新津
令學宮照壁宮牆萬仞四大字是其所書歸家時宦囊無
多賣文爲活吾鄉李公士琛守江寧值學使考試爲提調
點名時有賣茶人與諸生角口命役按地將加責大呼吾
王牆東曾孫也問諸生果然李公曰諸君皆讀牆東先生
文後人雖有過可恕也乃免之招至署問其家貧甚賜五
十金令改業其人感激乃奉先生手書未刻文章以獻李
楚航時隨任爲余道之

周夢熊松崖先生之季子也美才嗜學風流玉映從學先
君以翰苑相期甫逾弱冠遽卒有白雁詩三十首僅記其
一云匹練經過劃翠微青天界破碧雲飛烟迷湘浦孤聲
遠秋老胡沙一夜歸古堞丹楓空自醉衡陽小草不能肥
層城最是寒鴉色指點分明認鶴屏詩帶商聲少年不易
有似亦不宜有也余嘗與肩隨咏此如聞山陽之笛

自古忠義之臣致命沙場往往爲神遲士諸人扶乩忽飛
動疾書金川領隊大臣馬詩云血染團花舊戰袍當年受
命擁旌旄控絃響助邊風勁畫角聲催塞月高報國自應
尸馬革捐軀誰道死鴻毛千秋不泯忠魂在愛我還應謝

寶刀按木果木之難在乾隆三十八年夏其時溫公福爲定遠大將軍殉難三提督董公天弼牛公天昇其一馬公名全也時有牛馬遭瘟之語讀其詩英風壯節凜然可敬提督原名琮乾隆壬申探花官福建游擊因毆同官被劾後入順天籍己卯中式庚辰會試復售傅文忠愛其材從容奏之廷試 召對良久遂以第一甲第一人及第二二年授江西總鎮至是殉難蓋倜儻不羈之士也

金匱楊笠湖觀潮乾隆丙辰進士蓉裳蘿裳之父也先爲河南縣令曾於闈中夢麗女囑以桂花香卷子千萬畱意及闈表文有杏花時節桂花香句薦之得售乃侯朝宗裔

麗人疑是香君一時傳爲佳話笠湖後牧四川邛州過巫
山神女祠詩云神女祠前落日曛千秋禹蹟異傳聞君王
一夢渾閒事何處山川不出雲別具見解不襲前人事載
隨園詩話詩載兩村詩話蓉裳以詩鳴蓋淵源家學而父
子三人俱仕於川亦奇

雲谷與李兩村同年交好以詩唱和一日兩村過之畱飲
雲谷子懷淮方七歲戲於側兩村出對應聲而出對甚工
兩村奇之以爲後必能詩以女字焉少年膺鄉薦兄懷洵
與懷渭同榜舉人有三鳳齊飛之目懷淮號玉溪詩才敏
捷兩村謂本朝自張公鵬冲而外惟玉溪一人與兩村唱

和有冰清玉潤集官終縣令懷洵號方湖一號玉泉大挑
一等以母老就學博樸誠君子也嘗以雲谷所著雲棧記
程見贈子亦中副榜家學猶不墜云

楊司馬文叔英燦號蘿裳蓉裳之弟也與西躔司馬唱和
最多竟卒於蜀題女史丁采芝芝潤山房集云秀得江山
助鍾英閨閣中丰姿誇翠鳳夙慧具雕龍點筆肩舒綠添
香袖映紅耽幽書作伴好學石爲攻覓句侈囊富催詩喜
墨融情深偏作恨愛博尙虛衷影瘦通巫峽腰纖號楚宮
戀衾春宴起小飲興先雄高履蓮花步微吟柳絮工懶妝
脣淺淡倦繡眼朦朧洗卻鉛華膩還存荆布風作羹歌采

萊執爨任飛蓬琴瑟無交謫釵梳可御窮婢畱生叔虎夫
唱敬梁鴻處世身知足羞言室屢空嫁時衣典盡隨宦祿
難豐剪髮稱陶母門庭師謝公治家思儉約居上厲癡聾
不共牛衣臥終宜象服崇略才當重德坤道洽兼隆

傅思任家合州城南人稱臨溪先生登乾隆丁酉賢書先
官興文理番教職嘉慶辛未選山西沁水知縣解組歸田
每集賓朋把酒論文英氣勃勃道光丁酉以九十四齡重
赴鹿鳴宴黎眉鶴髮神明不衰前任制府蘇鰲石贈以詩

云羽衣重到大羅天舊事依稀六十年一榜青雲新貢舉

三朝白髮老神仙文章原敵公卿貴科第難兼福壽全極

羨鹿鳴三拜裏桂花新馥豔華顛兼儷以金花束帛一時
儒林傳爲盛事又二年乃卒

成都楊雲錦諸葛井云吟成梁甫耽高臥却感真龍惠顧
堅盡瘁臣心傳兩表偏安王業冠當年力噓火井迴炎運
更闢靈根導醴泉遺恨膚功勞九仞千秋用汲一潛然薛
濤箋云枇杷花裏美人居製就名箋玉不如節度有詩還
自寫少陵無句倩誰書洛陽紙價休嫌貴錦水瑤章好並
儲欲造鳳樓頻借汝韓郎幾度寄雙魚

資陽何生恍惚入一宮殿彩霞四射旛幢簇擁乘輦者自
空而下陞殿呼其名伏階下有吏對簿言其前生案未結

引至一處見婦人恨恨吏居間令爲誦金剛經萬部以資
福婦人色霽復至殿下見所識某生亦伏於地聞上傳呼
其名曰是惡人也當剗去其心一人以刃從事驚呼而醒
尋某生告之俱惶惑誦經如數是年登鄉薦某生則亞元
也始悟惡字去心乃是亞字

臨洮李元方苞以舉人爲桂林陽朔令入蜀有劔陽詩草
在巴塘有巴塘詩鈔後爲山東濱濼分司署在城外前臨
大河後闢小園官居多暇觴咏自適乃合前後集刻之爲
敏齋詩草吳松厓楊蓉裳兩先生爲之序佛圖闕云崔崑
關勢鎮巴陵傍有花宮時一登欲問鈴聲作何語世閒誰

是佛圖澄在巴里塘詩多咏邊方風景自山東返蜀因家
焉子清宴號定波援新例指捐四川通判

宋梅生鳴琦江西奉新人丁未進士以儀部出守嘉定在
都時與洪稚存張船山石琢堂諸前輩唱和風雅素擅在
郡修九峯書院建考棚以培士風署中鑿池築亭花木蔚
如遊處多有題詞重九日偕諸同人高標山登眺遂至萬
福寺歸飲衙齋賞菊用社工部九日七律元韻秋心如水
訟庭寬勝地餘閒結古歡難得重陽好風日依然同氣舊
衣冠馬蹄盤折都行健茱萸佩闌珊不覺寒試上最高峯頂
去雲山無盡耐人看豐年差免雁鴻哀柵板聲中往復迴

礙眼叢篁迎刃解乘流小艇過江來襟痕尙挹凌雲寺徑
草全荒爾雅臺省識此身圖畫裏歎思歸覆掌中杯不厭
更尋城北路何須遠訪大江濱庭空古樹斑苔溼石老殘
碑鐵畫新二百年餘仍此日去來因裏識完人

萬福寺有修城大碑

爲明給諫安磐書其年月

乃嘉靖丙戌九月九日也劇憐千佛名經後多少遊車隔

軟塵折腰私愧柴桑宅愛士虛傳郭隗臺席帽輕風隨意
脫黃花濁酒媚人開餽題錦字徐徐就月破微雲欸欸來
點檢杜陵詩事在當筵莫怪鉢頻催卸戎州事赴任嘉陽
竺山先生以詩送行依韻奉和作郡端宜近益州凌雲時
擬夢中遊未酬玉局三生願先爲涪翁一載留

戎州爲涪翁舊遊地

見慣兒童迎竹馬難移風俗愧刀牛鎖江亭畔經行處默
數瓜期又及秋梅生姊適徐某節婦也善詩有味雪圖自
題云十笏危樓千里雪半甌清味廿年心所稱竺山金堂
陳姓名一涸竺山其號也梅生先生子亦入詞林

前任榮縣許滙泉源湖南湘潭舉人嘗以事邀宋梅生太
守至署與劉別駕應蕃及幕友郭棹杰陳一涸唐張友何
椿齡賞荷賦詩梅生作序云三榮當南宋時西南一大都
會讀晁陸諸公詩文備言山川風土之美歲夏五以公至
止彌歎昔賢歌咏不虛滙泉許明府新葺鏡香亭環以水
可十畝烟汀霧激亞以樓臺朗朗然如在鏡光中於時快

雨初晴風荷萬柄清樽紅燭繼以歌詩聯句成篇舊地快

新遷佳游訂往年黃梅初過雨

生梅

青笠正耘田攬轡攀層

磴劉應蕃

鳴騶度遠壑勞農施懋獎

郭棹

敬老引華顛欸欸

詢禾黍

陳一淵

懃懃課市榷計程稽廢墩

唐張友

訪古剔荒磚

水穀爭搖旆

何春齡

山花故壓肩一宵圍竹語

生梅

二簋野蔬

筵雲豁遙岑外

蕃

風清曲蓋前峩峩榮隱近

棹

乙乙冶官

連郭抱雙流合

湘

原圍萬井偏江山唐域貴

友

文物宋人

傳恰數羣英聚

椿

歡聞小隊便黍迎巡部澤

許源

日暖進城

烟所愧香花供

生梅

同將孺穉牽旌旗剛止處

蕃

樓閣小吟

邊承蔭春生屐

棹

開窗翠潑天畫橋低亞水

湘

冰簟軟鋪

綿境以壺中大

友

帷還鏡裏寒

春

猶帶露娟

娟九品宜叅佛

源

三峯欲問仙

梅

太乙竟誰

眠印雪痕方記

蕃

題襟席已專

綉

衣京兆讎

錢泛覽劉歆籍

油

分嘗陸羽泉

友

笛好客初

撚忽草蟲魚疏

椿

橫張鄧馬弦

源

藹藹蕙蘭

全一昨瓊華夢

梅

頻年席訴纏

蕃

寧笑蟻趨

羶屈曲蟠金戍

油

連環悶錦乾

友

行幕使君

蓮帳未借歐九

明

府曾邀杏坊

秀

慚茲樹橘千

鑑源總與悟香

禪

語妙拈來得

梅

詩愁醉後痊

日蕃卜夜更隨

綠

電影搖官燭

油

簷花幌彩箋

琴

尊

名

士

氣友燈鼓酒人篇戴斗杓應轉椿傾珠茗載煎願船森欲

曉源

高誦各陶然

梅生

途次復寄滙泉詩云山中竟夜

雨離披曙色輕烟起較遲新漲纔添四五寸高荷稍失兩
三枝尋芳心醉非關酒覽勝人多合有詩最喜更浮秧馬
足梯田高下正相宜滙泉和云朱蓋青驄按部來懸知問
俗每遲回絲絲梅雨千村暗漠漠墟烟萬頃開茅屋書聲
時入耳戍樓人語乍登臺關心長記豐年兆早稻花含一

寸胎

吳壽廷學使樹萱曾決諸生四人必中乾隆甲寅恩科一
榜中其三落孫山者丹稜彭蕙芟也號田橋實高才生與

船山爲契友嗜飲工詩酣嬉淋漓船山贈以詩云直從商
羽彈孤調豈信離騷是變聲有棧道雜詩三十首俯仰哀
吟兵火之餘閱者心惻嘉慶庚申始舉於鄉入都爲紀宗
伯所知竟卒於京寓題楊子宗同年覆瓿集云過夏人如
病談詩尙未慵性情孤自愛風雅遠能宗健筆千花燦香
雲一硯濃平生商推意載酒好相從

吳若雲號絳衣海客毛大瀛之室也能詩咏紫薇花云濃
姿輕點碧天霞坐對空庭月影斜記取絲綸高閣下燃藜
夜照紫薇花海客殉金堂之難年逾六十夫人吳氏猶在
海客少時喜爲邊塞之作悲壯蒼涼來川致命沙場若有

預爲之兆者塞下曲有云朔風吹水冰紋裂黃雲凍損刀
鏃缺三尺霜鏃獵地飛土花斑斑蝕寒月揮刃溟濛甲馬
嘶鬪體墮地凝無血戰城南起云戰城南復城北將軍揮
劍鏑百戰不得息健兒怒突圍義憤壯顏色征婦怨篇末
云妾身思君如畫燭無聊更把金錢卜金錢卜兮音信稀
况多惡夢縈心曲忽報東家火伴回始知戰死沒黃埃萬
里何人收白骨招魂無路發長哀每首若自爲寫照吳夫
人三復之下能勿愴神

岳秋塘名炯中江人大將軍威信公後拔貢朝考二等

高宗純皇帝垂詢云汝乃岳鍾琪之曾孫耶秋塘卽奏對

稱旨以教職用後擢知浙江浦江縣訟繁俗悍悉以慈惠處之百姓感戴後將入都貧不能具行李浦人謀有以助之力辭乃止其啓有云雖清官不愛錢原有不貪之寶而行者必以贍諒無不受之金措語甚工子維城翰林院庶常維坤維垠俱舉人按威信公父昇龍爲四川提督時聞本籍荒旱乃擇三族之近者相識之貧者俱迎入川極力周卹德莫厚焉故世襲而外科第踵起後人分處金堂彭山中江

王蘭泉先生初受業沈歸愚之門與趙璞函作哲共事軍營璞函爲吳中七子之冠詩筆矯健蘭泉從軍以後始變

而險峭刻詩不多名啓焜者蘭泉呼爲弟詩亦豪健由縣
令官至四川布政馬邊烟烽城雜咏絕好竹枝溼翠青葱
暝色涵空城寂寞籠輕嵐振衣煙草峰前立積雪連天指
劔南當年設險壘重關旌戟森羅控百蠻今日太平風景
好野棠花落古城閒

前明萬曆十七年築
煙草峯城戍兵守之

左插雲偏煙草

花又遮半面抱琵琶雙雙高綰青螺髻淡遠峩眉暈曉霞
煙草琵琶城
左右山名 茯苓琥珀滿涼山瀘水支流似玦環 聖代

漸摩聲教遠春風先度八家蠻

康熙四十二年涼山乞黑
租租屬乃巢業業旁阿孤

駱東明州樂路遮大羊腸嚼略納味幹田日淡風高古夜
垣路引麻柳垣必了阿招八土百戶歸誠

郎施家塞口接蠻荒年年十月來山市爭買青鹽換麝香

西南魑魅昔縱橫千里連營倚角成當日木瓜羣鼠竄論

功應數播州兵

萬曆十六年正月撤假由木瓜襲主帥李應祥營播州楊應龍兵破之

全師

輕入虎狼羣弱卒投戈勢忽紛白骨問誰馬革裏可憐失

律李將軍

萬曆十五年建昌兇夷王大咱擾害議者以賦乃爲大咱之後戶調兵三千以都司李獻忠防

成九年乍許降誘入涼山陷賊死焉同

時守備劉繼祖指揮尹從壽俱沒方略猶傳李廣才威

聲更怖郭旗來窮酋塗戲真堪笑三寶雲梯殲巨魁

郭成

邊副使監軍李士達方略搗穴擒渠戰績居多塗戲叛酋安興事二寶山名

邊地重收不合圍

書生約法佈軍威於今殘堞蒼烟裏誰識渝州張指揮

指

諱頤南明末人以秀才從軍累功署馬邊守備其時邊境復爲蠻獯侵擾指揮悉驅之歸巢

千山啼破

子規魂飛盡烏絨花雨昏有客分蹤尋九堡碧雲青嶂十

三墩

九堡十三墩與
煙峰城同時築

躡躡山河涉水滄忽驚節物暗中移

芙蓉嶺上黃梅熟江外鱖魚上市時

絳州古稱外江產
鱖魚夏日始有

簌

簌聲如蟹劃沙蕙蘭叢裏走香蛇蒼苔露冷垂垂白開遍
金釵石斛花青鞋布襪一微官歷盡崎嶇九折盤眼底蒼
涼餘故壘題詩畱與好山戀

蓋太守方泌號碧軒山東蒲臺人幼恢廓有幹略以拔貢
就職來川教匪滋擾以毒置米麵起運故爲賊掠去賊食
之多死積功至太守由順慶調成都遷臺灣加道銜告歸
有詩二冊嘗以刻本見遺郡齋秋興云魚鳧開國接蠶叢
五馬西來問俗同一代詩名傳杜曲百年儒化起文翁秦

關樹繞青門道巫峽灘高白帝宮人事重教迴首憶寥天
蕭颯正秋風陳倉口北棧雲西誰向青蛉尋碧雞名馬爭
騎紅叱撥征人盡唱白銅鞮峰迴疊嶂山疑斷澗落深巖
路轉迷無限客愁增悵望那堪夜夜子規啼錦官城外錦
江流夾岸蕭疎蘆荻秋三國名猶傳木馬五丁人欲逼金
牛山川玉壘形還在風雨峩眉勢未休八月濤聲翻去浪
巴州東下是渝州澤國江山似畫圖文成十載賦三都此
心任酌貪泉水爲政期還合浦珠黃葉霜飛寒橘柚白蘋
風動亂菰蒲漁人網罟清潭下三尺銀鱗入饌廚紫塞黃
雲雁陣來臨風極目一徘徊干戈擾攘經戎馬世事銷沉

問劫灰竹葉杯能浮酒綠菊花籬爲傲霜開高堂竊喜板
輿近自舞斑衣學老萊風流人憶謝元暉遠岫窗中列翠
微洲渚沙明鷗欲下平原草淺雉思飛置身安得成今是
閱世眞堪悟昨非懸榻尙能通客屐於斯輪奐有光輝退
食餘閒暫掩關吟思忽到曲闌干千山樹色連烟暝一夜
潮聲帶雨寒漸覺催人惟白髮何從辟穀有金丹他年好
賦歸來日擬向江湖把釣竿九日登臺有所思風光却憶
去年時蒼蒹白露人何晚黃菊紅茱酒不辭共說嵇康眞
放浪誰知宋玉是傷悲清齋未敢言高詠日暮關城畫角
吹子鉦道光癸巳進士陝西知縣以才調繁陞州牧

川中教匪徐添德等起達縣亭子舖東鄉王三槐等應之
自湖廣總督勒公保移督四川下堅壁清野之議與叅贊
大臣德公楞泰追剿巨憝漸就殲擒蓋自嘉慶元年至八
年而武功告成十一年十二月突有綏定營兵之變弁兵
王得先以守備王國雄扣餉糾眾爲變縣令余永寧坐堂
皇諭之曰爾殺我勿傷百姓賊羅拜去遂告急于副將桂
函率團勇前後夾擊擒其魁五日而亂定焚殺男婦已三
千餘人矣典史王良佐諸暨人頭被棍擊幸不死作綏城
書事五律數首甚詳核廐馬忽驚鳴霜天列焰明萬家鷄
犬境一夜虎狼城縱火衝營勢操戈索將聲古來方鎮亂

戎首是驕兵白刃當門立青旗繞市翔饑寒驅雀附桀鷲
助梟張鎖鑰虛完壁緘滕失智囊十年居積地赤月冷空
場日出關初閉原空燎未收紅巾屯水背白鏃向城頭有
劍還藏獄無珠免墮樓大夫立馬望破涕慰歸囚蠟檄馳
深夜金戈倒下風一呼團卒萃三歎使君雄身繫酬恩劍
圖開制勝弓琴堂能戡亂翠羽答殊功捧喝迎頭受倉皇
禦暴時脫身宵草檄跛足曉登陣黃綬功名薄青天杖履
危吏民多怨語肘腋變難知孰寄干城任公侯望已虛金
湯輕脫屣閨閣重牽裾漢水全開網通川繼覆車微生不
自衛葵藿問何如天與熊羆將偏師報捷章一宵空貫索

五日掃欃槍 殊錫楓宸寵榮名梓里光新銜加健勇詔

爲勵戎行寒逐烽煙盡春隨節鉞臨攜囊分白粲計屋散

黃金欲化飛揚性先安反側心上公操二柄長治繫懷深

直指按江城西街血有聲監門知效死守闕敢逃生民氣

隨風動臣心鑑水平勿奸司憲法刑賞最分明千騎東方

去雙旌北道來飛軒何絡繹脫劍且徘徊綱紀推新將旬

宣倚外臺龔黃及韓范代有濟時才霜雪催蒲柳河山習

鼓鼙無能遭白梃有賞愧朱提哭母憐羣稚次媳思鄉滯

病妻慈闈盼消息驚喜兩難題又作五古呈余云勇士歸

無鄉厠名入軍簿可使亦可虞此輩動越矩悍卒譟方鎮

厲階鑿往古守土非其人遇變或召侮通川十年兵眾瘡
肉纔補狼子怙野心梟羣習嘯聚火攻出下策驕奴素營
主憤氣焰燒天禍事機發弩刀火光中城狐擁社鼠諸
囚猝被刼一尉力難拒糾守職何事茹傷不敢吐琴閣深
且嚴赤月夜正午肘腋生戈矛長官手無斧捉刀顧縣尉
內訌乞外禦朱書與墨檄草草急就緒重賞得捷足義旂
決可觀甲兵滿胸中有時非延佇尉向府中趨囚歸堦下
俯感激守王章自請還囹圄忽聞排闥呼劔及中庭柱整
冠詰戎首詞嚴色不沮爾操壁上戈胡縱關中炬凌虐祇
一弁傷殘遍百堵寧可殺我軀吾民何罪苦爾謀卒歲資

俯仰惟予取汲汲解烏合各各投原伍厥辜無赦法吾力
求貸汝屈膝謝使君沉寃已難剖素感使君厚今聽使君
語但求活守闔歸休散徒侶倒戈下崇堦不動庫與府左
右無一人空拳不縛虎戴星謁上官激昂掩淒楚青旂奪
關出赤幟當空拄倉皇一九泥保障千家戶紅巾繞東郭
黑霧籠西渚登陣論大義仇得斯就撫彎弓躍馬走倔強
有餘怒狂飛却迴翔三匝空營樹意悔城下盟欲掃火中
土雉堞生風雲竿旌浩難數一發震天雷垂尾涉河去倘
遲一日備何以固吾圉招徠制其行不使遠颺舉星摧五
鄉丁電集四方旅飛揚及百里撲滅期一鼓會有飛將軍

東關近按部千金犒士卒五日成擒虜戾氣淨高霜殘魂
泣凍雨節麾漢上來開誠託心膂慶惠體 皇仁恩洋德
何普 寵錫下丹墀 新綸榮翠羽使君練戎務運籌無
缺精贍兵兼贍民衢巷塞歌舞濟時貴遇合勝任愉戴鉅
蜀民多願亂斬絲治可許實效著編團平時誠弛武寬大
爲金湯嚴明作干櫓功名不言勞循聲駕召杜作歌代銘
頌矢願息笳鼓余號梅村陞綬定知府

去絃州府城十餘里有大浸曰天池水淺處盡種蓮花深
處一望空濶土人相傳秋夜月明泛舟俯視城郭樓臺烟
巒竹樹倒影其中每載酒探訪微風一掠則波光蕩漾眼

界迷離最難澄靜時也

榮縣有名黑沱者水沉沉不知其底某歲因大旱車水灌田水落三丈忽鐘聲發於水際駭視入水三四尺見碧瓦獸吻儼然宮殿鐘鳴初歇雷雨暴至眾驚散矣去沱數里有大穴如筲井其來甚久某過其旁似聞有人呼救急以繩至挽上云夜行迷路墜此中已兩晝夜矣幸身掛樹枝不落下方每夜靜聞人語喧雜鷄犬鳴吠聲向曉乃止不知是何境也

四川學使趙公佩湘江蘇丹徒人喜爲詩每有所作輒刻一紙流傳考順慶時與吾鄉蓋碧軒太守甚相得去後道

中奉懷云旬餘捧襪筆花開探得驪珠載寶回料峭寒生
兼夜永廉纖聲透爲詩催人情乍暖酒方熟山意初指雲
又來一路行程君憶否枝頭先寄嶺前梅風流賓客綺筵
開率性都徵德不回別後詩篇勞驛遞春初遊興任花催
塵容厯盡星霜去山徑多從泥濘來盼到前旌重握手柴
門香滿好尋梅

趙公時官禮科
掌印給事中

省垣需次端居多暇省申畚師于郟縣一望平原清泚夾
道黃花遍野人家多在竹林愛其風景不能成咏前令李
馨有春日村行詩甚得余心因錄之菜花開徧雨初晴路
入前村略約橫斜日肩輿未得去竹籬茅舍讀書聲參差

邨落帶平蕪堰水灣環野徑紆最與吾鄉風土近鋤田先

種淡巴菰

烟草本名淡巴菰

東風陌上聚紅帟知是清明野祭紛

細雨梨花淨林寺更無人弔鼈靈墳

鼈靈墳在淨林寺今寺已廢

散盡

輕陰野色勻曉行風景畫圖新七邨田舍多相似翠竹蒼
烟作比隣盡日經行野塢閒竹林蒙密水淙潺特尋古寺
無他事暫借高樓望雪山閨氣今朝是暮春郊行日暖動
微塵野芳薰鼻渾思睡一陣風來忽健人春夏初交氣候
殊乍晴乍雨景模糊寒原宿麥行人少慈竹叢深叫鷓鴣
滿園桑柘綠依依蠶事川西亦未稀閉戶纜絲斷來往離
閒時有繭蛾飛薰風漸至日初長到處庄家農事忙陌絮

塍花飄欲盡水田漠漠長新秧踏礪穿林日漸晡僧寮一
飯飽伊蒲不知肉食何滋味冷落山家櫻筍廚

李福建孝廉乾隆間

昔魯仲連却帝秦下齊城脫屣千金古今艷稱於蜀得一
人焉亦其流亞也大竹王士品字元一幼孤奉母目光如
電淹貫經史下筆千言猿臂善射通孫吳兵法旁及象緯
醫卜無不精熟明末爲榆林總鎮嘗以八千騎破孫可望
十餘萬以事去官而明社墟矣康熙時流寇餘黨據毛龍
山川督李國英堅請入營定計作長圍絕賊糧道渠魁授
首軍門以運籌有功兼悉川湖形勢將題奏力辭贖以黃

金三千笑曰爵祿大於此且辭矣李公曰功成不受賞丈
夫哉既而三藩造逆廣渠營諸縣皆沒士品單騎見聞中
高總鎮請千騎自將一戰破賊復渠城高自將來會復發
策前後夾擊盡降之將上其功於朝復辭之歸隱大將軍
趙良棟征滇遣官致聘作書辭之以曹彬相勉建日岫亭
於柳城山上草履竹杖栽花種竹日與文士吟嘯其閒自
嘆云何當十六載反覆天之涯得失萍無定浮沉志轉賒
一身長作客半世未成家獨剩腰閒劍橫光拂晚霞山莊
卽事云重巖難久住結室小山阿覓徑剗幽竹採泉剪薜
蘿留窗邀月伴啓戶納樵歌非獨愛林麓浮名一刹那贈

友云相逢意氣渾相投笑傲溪山天地秋擊楫羨君能事
業敲壺媿我拙風流匣中留劔延津躍囊底儲書圯上求
吐鳳才華從蜀顯懸知記室借前籌別張文海云生平境
遇事闌珊徙倚年華道路難夢斷瀟湘雲影幻聽殘河朔
鴈聲寒自傷老去心猶壯獨嘆時清俗未安客邸訂交君
有意錦江春水正漫漫子因以曜康熙戊子舉人浙江秀
水知縣工詩古文自作墓誌銘亦曠達士也以暹乾隆己
酉舉人直隸阜城知縣孫正策與暹同榜傳其先從建文
帝來大竹子孫遂家焉

趙玉山名遵素華陽人父宏信爲浙江定海令人呼爲趙

紅杏玉山少年美丰標聰穎絕倫視科第如拾芥僅貢成
均乾隆五十五年孫補山相國士毅持節來川房師卽玉
山尊人也歿後家貧母子居陋巷狹不容車相國來訪步
行入謁厚卹以金是歲秋闈玉山避嫌移居郫縣教授不
應試晚年放情山水喜爲詩酣嬉淋漓超出流輩友人曹
易山爲藏其稿美不勝錄飲酒四首極滑稽之趣且獨與
婦飲頗勝俗客對梅聖俞句如何痛飲時婦亦饒俗態但勸且
勿醉瓶竭且勿再恐似旗亭遊料我復倒載不知玉山頽
頽時亦可愛不解文字飲惟能醉紅裙韓退之句紅裙艱所遇
人生傷離羣富兒綺筵上裸坐羅羶葷千金博一笑於我

如浮雲寄言素心友詩酒來殷勤爲我踏踏歌舉白還浮

君舉杯邀明月對影成三人

李白句

明月有時暗杯酒常具

陳頽然北窗臥恰與琴書親莫耽秋夜涼月出傷我神但

恨多謬誤君當恕醉人

陶淵明句

柰何陶靖節不似劉伯倫暮

天而席地天地恕我真眾人竊姍笑毋乃非所親婦言尙

不用二豪徒諄諄薄羅衣薄羅衣幾時裁思君一回着一

回羅衣着破君不來山高不過屋登山何崔嵬日日山鳥

啼日日山花開花開欲落顏色改鳥啼不住肝腸摧妾身

化爲石羅衣化爲苔春柳次蔡雪村先輩元韻兼擬其體

垂垂金縷最風流無那消魂望陌頭沾雨綠迷簾外草和

烟青映竹邊樓章臺人去關心地泚水春寒悵遠愁白傳
樽前歌一曲小蠻輸却舞腰柔短簫聲裏重丁寧腸斷東
風繫馬亭南浦愁牽絲裊裊北窗人對眼青青招來月姊
難留佩擲去鶯梭不碍翎賦就長楊新釀熟一回沉醉一
回醒夕照疎林叫畫眉板橋長短寄相思天涯有客防攀
折庭畔無人好護持孝伯風情應莫妬東陽消瘦幾經時
兒家門戶愁深鎖牆外枝枝繫別離靈和深殿淨朝烟憶
得風流未杳年杏子單衫嬌鬥舞桃花紅暈妬酣眠招邀
故館聽鶯處寂寞空堤欲雨天披拂長條莫惆悵梁園春
色十分妍室人敬筠卿華陽太史冠亭女亦能詩玉山自

輒歸筠卿以詩嘲之曰立錐無地不憂貧况是諸方托鉢
人行脚歸來無長物此身依舊赤窮身當時唱隨頗稱風
雅所著有松竹齋集

福建侯官蔣孝廉垣字用崇母歿廬墓三年有羣鳥集鳴
墓巔人以爲孝感康熙甲寅耿逆變作垣逃匿橋園洲僞
曹以宿學交薦乃以巴豆漬面松煙熏目託廢疾拒之嗣
約李天然等謀內應以延王師事洩天然等俱被害垣得
免王師入閩經橋園洲士民舉垣忠節大帥康親王疏聞
授歸化教諭遷泉州教授陞鹽亭縣令次文湖州太元觀
題壁韻垂老謝王事煙霞痼病存有心耽翰墨無力振乾

坤民社情長繫家鄉淚暗吞山靈終一別懷抱向誰論用
崇居官廉明旋乞休卒

周氏南川周篁村姊幼明大義通經史歸榮昌監生敖信
臣年二十九而寡翁名時忭初爲廣西養利州牧後遷奉
天復州以事罷官旋卒氏時隨任率家小奉翁姑及夫櫬
萬里歸葬家貧簪珥衣服鬻已盡率其二女歸南川無子
後十餘年有朱小髯光昭者敖氏壻也其子從榮昌舉人
敖彤臣學彤臣見其聰敏商於篁村承繼信臣名右賢戊
子舉於鄉始往南川省母時氏已年六十矣丙申右賢成
進士出知貴州桐梓縣迎養年餘返南川歸家病卒氏愛

子不啻已出右賢亦善於色養終始如一篁村輓姊云道
路備極艱辛出嫁於粵返寓於渝旋隨任於幽燕更往還
於吳楚晚就養於黔中萬里奔馳垂老仍歸故土遭際尤
爲奇絕髫年失怙弱齡失恃中歲並失翁姑越期又失丈
夫歸寧復失繼母一生孤孑顯揚幸有佳兒氏解吟詩少
與兄姊妹隨侍繼母常夜坐聯句年五十家人咸以詩壽
叔貧谷亦作二律云中巾幗無勳業難爲介壽言余常披女
史姪可號名媛旅館衣何薄寒天竈不溫姑嫜遺櫬在辛
苦返鄉園女誠誰傳授髫齡叔作師幾回馳遠道今見鬢
如絲祝嘏無庸酒銜杯強索詩眼前增快壻何必覓佳兒

壽詩共數十首輯成一帙爲其塏陳鏡湖攜去右賢號秋
田今復本姓現陞貴州威寧州知州原籍浙江嘉興府海
鹽縣禮部侍郎朱公虹坊方增之從姪修撰朱朶山昌頤
之從弟

朱情田 陸原籍涇縣自幼來蜀爲巴縣諸生有讀蘇軾詩
集集歸去來辭字云人生貴自得流寓亦何常松菊行將
老田園已就荒倦遊非傲物觀化願攜觴聊以安天命無
心問帝鄉始願良休矣今將命駕還春風吹遠岫飛鳥入
遙天倚杖懷雲壑臨流賤酒泉琴書聊自寄矯首問歸田
迷途欣始悟僮僕已迎門有酒尊常盡無人菊自存未知

求富貴猶得老田園前路將奚向崎嶇不易言晨光遙入室世事復奚求窈窕尋前路崎嶇悵遠遊還將老衡宇何事向荒疇盤膝安吾命無心任去留春及人將老欣欣木向榮審時觀萬化相悅話三生攜酒來三徑關門感物情庭柯時翳翳憩息倦將迎

侯官朱錫穀菽原瀘州牧者怡山館詩鈔有隴蜀遊草劔州旅夜有懷晚宿隨鴉集翻成獨鳥栖風聲來劔外人影落巴西旅壁一燈淡山城孤柝淒客懷渾不寐倚枕聽莎雞閩州今夜月分作劔州看拙宦愁家累謀生愧旅餐水深魚信遠風急雁行單憶亡弟虛幌無勞倚清輝祇自寒離

鄉身易賤野宿萬山中破壁風欺客荒籬花惱公寒光孤
劍白殘醉冷醅紅夢亦成巴字迴環更向東去日同催穀
勞生嘆繫匏艱難魚上竹辛苦鵲營巢向秀猶思舊揚雄
未解嘲百端終夜集明發又荒郊

王溥號雲泉順天大興籍工繪事山水樹木氣韻沉着坊
肆間仿效者臃腫穢濁可唾也嘉慶閒任中江典史於大
雄山下掘土得萬柳培龍四大字於厓間不知刻自何時
其地左大雄右銅魚中貫小溪前人種柳夾岸後爲民居
邑人李福源劉隆瑄購得復種二萬株以還舊觀潼川守
張松蓀咏之云五城四面皆岡阜聯雲塔下形忽剖一帶

溪流對雉牆氣洩無餘同漫口巧將人事補天工種作陰
濃萬樹柳春歸獨擅歌鶯叢涼來宛是鳴蟬蔽暖拂三眠
學漢宮青映百泉摹隴右朝烟半鎖舞迴風乍似蒼龍達
上走變化飛騰若有待蜿蜒屈伸形不偶最憐風景三春
餘一天飛絮飄千畝城頭放眼好歌詩陌上攀條頻進酒
錫名我欲追排衙迎風得似曲江否

仙人掌掌匾而長厚每層茁數掌槎枒而生背面有刺如
虎舌形年久者樹高於屋開花五瓣金黃色相傳有仙人
掌上玉芙蓉之語結實如雞子熟時黃色味甜

敘州劉雲貧甚偶見一磚以石擊之作金聲以爲銅也賣

於銅匠陳某陳試之舉還曰是黃金也入市易白金數千兩以二百金與陳不受固納諸懷陳由是富

清溪鸚鵡最多木末聚集成羣胡桃熟時尤飛翔無數綏靖屯所產亦眾禾稼每爲所啄驅之惟恐不去內地乃以罕而見珍矣

聶蓉峰先生卸四川學使任屏騶從選勝遊覽吟咏自適或命駕至陳卯生書室縱談久之乃回京無關防之嚴有山水文酒之樂其豪興可知在任時詩文偶獲佳篇贊之不容口雖至劣者必親閱加批憶昔山東學使劉金門夫

子與此相似

名鳳詒江
西萍鄉人

顧斐世字含象錢塘人遊幕於蜀談鋒颯發四座傾靡現
就陝西藩幕章紉香素與交善寄其詩登白帝城謁昭烈
忠武像渡灤水至東屯訪草堂遺址用東坡游武昌寒溪
西山寺韻萬山揖夔州拳石障峽口千秋一壞城我來徒
搔首監子幾成名怒蛙井底走遺恨失吞吳大名終不朽
躡屐陟危崗崇祠立高阜亂石挾雲蹲驚濤卷風吼顧命
托遺孤君臣良師友魏吳已盡沙鍾鄧亦稗莠磊磊石頭
城荒煙沒蟻樓荆棘埋銅駝兩晉更何有至今八陣圖風
雲護江藪往者不可作來者傷蒲柳夕陽渡灤西復訪東
屯叟草堂緬遺風欲奠無椒酒他日許重來合裹干囊糗

灑灑石用東坡武昌銅劍歌韻驚濤拍岸團溼沙漩渦萬
轉繞妖蛇一石直投天壺矢千古見首靡見尾如被如馬
忽如象力能獨障三峽水洪荒苔蘚堅結鐵雷斧無鋼不
敢裂大舸小扁拜石過風腥疑澆老龍血當年位置意何
爲我欲磨礪勒新詩君不見大雅堂中幾片碣斷臥前山
柱牛頤黃山谷書杜詩百首勒石修大雅堂蓋之今堂圯石皆無存人日謁少陵祠敢
道題詩寄草堂偶來瞻拜只心香黃雞白酒逢春社冷炙
殘杯憶古狂羈客似公真不易後來如我太尋常山城桃
李無消息夢斷當時黃四孃春柳贈秋屏先生時將觀察
潼商卽以送別驚心春色已如斯綠滿河梁幾萬枝着意

東風真欸欸無端別緒又絲絲鶯聲上苑遷原早馬首長
安去願遲記取灞陵隄畔過好回青眼望峩眉傅太守秋
屏云見贈之什纏綿無盡當此春水綠波春草碧色更難
爲情矣太守名繩勛山東聊城人時守夔州今任雲南布
政

尉琴南名方山成都人嘉慶戊辰科舉人以教習選蓬州

學正未赴官卒臨潼古跡狼石

在驪山下相傳秦修墓道石不可開皇甫持正有狼

石銘六國之滅如死灰萬里築城胡不來意向所至無不至

神仙亦現金銀臺暮氣有時盡狼石無由開吾聞女媧自
昔都驪國煉石上天補天缺空山餘一拳尙足褫秦魄秦

奪其魄聚而殲此石又壽三千年不韞瓊玖不生雲烟不
可轉移不受雕鐫天下頑石無其頑嗚呼人生安得如汝
頑華清宮刻金鑄玉羅畫工連山殿閣覆崑寵香雨珠塵
五十里三郎常幸華清宮羅幃深深月雲屏曲曲風溫泉
笑語迷西東醉裏聞歌醒教舞宮門不想景陽鐘楊家姊
妹皆花蕊長生私誓惟妃子傾國傾城亦偶然但教立地
成連理延秋門外尙雙飛倉皇妖夢踐羅衣腥羶滿地花
狼籍南內無人空自歸並蒂芙蓉合歡阜莢春雨頽垣秋
風敗葉驪山崢嶸露山骨野叢冷露飛蝴蝶語極厯落可

喜

毘陵劉慕陔以進士牧綿州白蓮賊偷渡嘉陵江劉爲守
禦計捐米五百石錢千緡爲士民倡民皆樂輸得銀六萬
兩修築城垣士民扶老攜幼入城俱得倚庇無一被戕者
將軍魁公亦領兵萬餘駐綿之金山驛相距僅三十里恐
有匪徒混入難民內城下有船數十艘不許撥往濟渡慕
陔目擊阽危不忍以非已部民遂懇視請於將軍不得繼
以涕泣跪求願供具軍令狀如有不測惟州牧是問於是
萬餘人咸得生路其自舊綿赴新任也迎者送者父老旌
幢兒童旗傘幾於錦天繡地在籍李翰林調元曾有句云
百堞能容千戶住一航先救萬人生今競稱劉使君城蓋

自古官民之相愛未有盛於此時者僉曰生我者父母活

我者劉使君也

刺史名印銓
趙雲松之甥

教匪蹂躪其間孝子節婦遇難流離死亡不可勝數惟賴有心世道者爲之表揚潘東菴有詩得諸目見耳聞者錄之以當詩史楊家婦云庚申年鬼在斗嘉陵江上遭賊蹂躪得老弱充庖擄得婦女強配偶墊江女子楊家婦一家十人同出走誤投賊網都成禽縛向山前將動手三百餘人刀下俎父啼子兮兒呼母頃刻殺人等刈麻剗剗肚腸如雞狗婦有姿色賊有心竟在不殺隨左右婦睨舉室猶生存泣血哽咽強開口大呼王爺天地恩奴願終身奉

箕帚視茲錦衣繡食場勝如身伴農夫醜但求免死一家
人生死相隨無先後賊諾一聲僉釋去眼見鮭魚脫做符
轉向阿郎重別離從今不操郎并曰我有疋布斗米錢藏
在山南小培塿明發歸取作生涯補被磨漿事姑舅賊喜
而笑轉生憐顧謂此子真不苟頃刻官軍驀地來鳥獸分
奔如雷吼美人造次不可離一人一騎兩人守走及五里
天蒼茫策馬逕向南山阜加鞭飛鞚巉巖投觀者如山身
抖擻賊人太息驚且去烟飛火發千里藪阿郎歸來悲且
疑潛步山南豐草蔀瞥見病馬臥巖阿更聽呻吟如破缶
尋聲覓跡入長林乃見一人坐殘柳左股摧折右臂攀披

髮模糊血染首細認方知阿婦聲問答不辨阿郎某負歸
翁姑齊下拜楊氏祠堂君生受乃知忍死須臾間保身全
家世罕有嗟嗟自古女子節烈有其儔自古女子才智無
其耦豈獨女子無其耦天下男子亦顏厚長壽女云賊氛
張時川東北出沒往來真莫測就中長壽當賊鋒二十四
番遭殺殛有女子兮年及笄力弱不堪縛雌雞二賊強擄
馬上去一持矛鋌一提攜女子徬徨不自決心知此去情
難說老少之間用吾謀誓教二人生割裂私向妙齡欸欸
言彼狂且兮真糊孫但得他人不相犯與君長作雙飛鴛
頃之山頭聊坐定聞傳團兵來接應老者倉忙上高阜東

西南北憑探聽女子呼賊郎莫遲便旋吾欲遂其私借矛
作杖扶我下免受深深沒煙泥賊信不疑控厥馬轉頭却
顧伊老者不知矛向背間出俯身倒臥盤陀下輕捷如飛
轉身迴走向山前覓巨魁巨魁坦腹長松下當心一刺委
綠苔尋得馬來方逡巡瞥見同鄉共井人問奴爹娘猶在
否手提骷髏血濺塵吁嗟乎長壽女兒陳家子歸來了髻
猶簪珥我欲爲之傳厥行小姑至今香閨里安得塞上將
軍者免脫處女如斯矣長壽父子三人殉難行云有寇有
寇入我疆白日挈人如牽羊刀劔森臨憑問訊能否相隨
稱伯王不爾打發回家去剝厥皮膚抽厥腸長壽傳家三

父子同聲罵賊甘心死白髮雙雙雪滿頭指問皇天何負
爾慣作滔天悖逆人行見鼠輩族誅矣賊人大怒揮刀進
三人詈罵猶不止丈夫兒子挺身起以身翼親以頭抵項
刻血肉狼籍飛三人何曾分彼此父兮呼子子呼母一氣
相通直如矢鄒孔邱遠二子親目擊賊子爲之黯相視嗟
哉父子膠庠雄烈婦羅氏亦堅貞昌禮不愧讀書人子暄
真能負厥薪 天恩浩浩萬古名我爲作歌述厥行剛風
烈烈使人驚

世泰子文都字子京文璫字子珮皆翩翩佳公子也詩文
篆隸無一不工侍宦游蜀多有畱題庚子科應京兆試子

京抱恙出闈揭曉之夕雖登鄉薦竟赴玉樓識者惜之子
璣亦同榜獲雋有志進取寫作俱佳有寄成都舊交十絕
云十年前事歎全非迴憶巴山願久違可惜梅花三百樹
春風依舊草堂歸怕聽知心說少年少年公子太翩翩風
流不讓高千里書遍薛濤百幅箋猶記松州大合圍刀光
劍影雪霜輝一枝箭向天邊去射落山前野雉飛啞酒香
濃撇不開畫堂深處鼓聲催花枝疾轉來吾手笑飲郫筒
無數杯馳驅驛路五千餘駒隙流光感索居縱使故鄉山
水好岷山岷水更何如可憐雙燕奮飛高爲返家園向北
翽一旦秋風摧錦翼

長兄於庚子闈中抱恙揭曉日辭世

霜天月夜叫磬磬

日斜庚子令人哀一第難將素抱開妬殺三秋丹桂樹是誰領略色香來夏葛冬裘轉換忙年華無那去堂堂祇餘一事今猶昔積習難除是酒狂白雲搔首望難窮萬里雙親憶念同不是尊鱸思太急人欲省觀以嚴君有引退之志不果南行早投班筆學從戎紅綾餅餤曲江筵欲向春風結夙緣十里杏花開在即祖鞭未敢讓人先

儀隴有永濟廟水旱祈禱輒應相傳神姓張名英晉時人初拜儀隴令過采石江遇一取水女子姿貌絕世謂英曰五百年夙約與君當會於儀山英叱之至任半載日夕聞機聲一日率部眾逐機聲而往行數里至大儀山一石洞

門鑰宛然前女出迎相攜而入洞門卽閉從吏哀號有二
圓石自門隙出眾以石歸近縣五里不能舉邑人建祠塑
像各置一石於腹

四川將軍昇寅字賓旭由選拔中式入詞林改官刑曹官
至尙書著有皇華草平湖橋狄青拴馬樹歌云趙宋防邊
惠且寬西北諸夷貪而殘封豕長蛇趙元昊天都野利真
雄奸小范胸中縱百萬難使西人心膽寒韓琦仲淹貶秦
耀銀綬環慶城無完仁宗赫怒下嚴詔收其賜姓削其官
寶元二年十二月命將狄青復保安將軍當日鎮西粵三
鼓曾奪崑崙關威名早已震西夏一戰敵人走賀蘭賀蘭

山下平湖岸橋邊大樹垂溪灣將軍破敵憇樹下低柯繫
馬縛征鞍我來平湖秋已半輪囷大樹鳴鳳鸞風雷兵燹
閱歲久皺皮鐵榦新枝蟠牧童摩挲談往事甘棠猶憶狄
登壇大宋名臣與猛將西征燦列青簡端銀川向無別古
蹟惟有此樹根瀟漫吁嗟乎人貴立德次立功莫使姓名
同草木一朝搖落隨秋風至寧夏云賀蘭山色豁雙眸楊
柳村邊古驛樓一夜鯨風吹海立滿身梅雨渡黃流炎蒸
午日昨猶暑涼透綿衣今乍秋隨處清渠環綠壤果然人
到小蘇州八月十三日出滿城南門外登嵐峰寺望賀蘭
山云何處烟霞盪我胸城南古寺歷奇峰披雲樹色連還

斷過雨嵐光淡帶濃朝旭燦開金翡翠夕陽秀削玉芙蓉
葦塘三面青環繞疑在瓊樓十二重

中江縣迴水舖旅舍題壁四絕妾成都迴瀾閣下人也幼
與妹舜英學詩于從祖姑恆願得知音者共事巾櫛此生
之念畢矣不意于辛巳夏有秦人髡奴兄弟以重金餌予
父母售予姊妹爲妾歷途路之崎嶇備嘗百苦對村夫之
鹵莽致嘆終身嗟乎貌不如花敢言薄命遭同集蓼未免
傷心昨宿趙家渡見蜀女翠娘題壁二絕憐所遇與予姊
妹略同分步其韻舜華云一從彩鳳逐鴉飛風韻春情漸
漸非最是傷心驢背上聽他杜宇勸人歸舜英云遠嫁吾

儕步後塵文章印板不翻新羌胡先有明妃去豈獨文姬
是恨人

潘江遊蜀與諸詩人唱酬贈趙稚竹云攜琴佐單父弱冠
早服官箴琵琶座方合古調莫輕彈湛湛青芙蓉利絕此何
器繞指未能柔奇鋒莫輕試我琴从焦尾有劍亦蒯緱微
言愧持贈長嘯蜀天秋琴臺朝日黃劍閣暮烟紫萬里雲
鵬程看君自今始

宋紹興間有沙門曰鐵琴愛山水之勝卓錫梓州忽聞江
中呼救人聲甚急往視之則枯槎浮水上下以杖却之而
歸呼聲益甚取視乃旃檀也隱然有婆叟仙三字遂鑿爲

像祀於華嚴閣後常化爲白衣士挾胡盧以鍼藥救人疾
苦且先見夢於篤疾者無不愈人以其感通響應因名其

寺曰靈峯今睡仙像病者摸之輒愈吳樹臣詩云翠巘凌

雲聳清流曲渚旋仙踪浮水出墨妙現身傳有闕立本吳道子畫觀音

碑二絕壁牛頭拱青筠鳳尾鮮攜瓢丹鼎祕煮茗石牀眠

有睡仙顏紺殿金輪麗層臺銅鼓圓江光浩浩淑氣草

芊芊柳色舒金縷松聲叶雅絃芳華同越嶠春意繞岩泉

野鳥閒翻翅山僧不記年幽棲真福地靈蹟銘山顛

漢州張雲谷以詩名蜀生三子皆孝廉以詩世其家余識
其長子玉泉懷洵兄弟聯吟甚樂事也玉泉咏資州界泉

州西五十里西岩石罅中出 縱步碧山阿靈泉出石竇一
泉二一清一濁劃然不同 泓湛幽深瀟瀟鳴玉激銀河瀉九天翠影搖羣岫跳珠澗
斜陽清音雜宮奏涇渭忽中分豁然判左右有如巴字江
曲折成篆籀又如赴壑蛇盤旋勢若鬪玉斧何年劃汪洋
各奔湊以此悟化機川流渺莫究篔簹谷云修竹何亭亭
掩映篔簹谷翠影拂流雲疎枝雜喬木瀟洒出風塵芳姿
伴幽獨我家雁江濱琅玕青繞屋曼玉調宮商迎風弄箏
筑偶爾涉緇塵人海共奔逐望斷湘浦雲夢繞淇園隩今
忽見此君故人欣在目好訂歲寒盟堅貞保初服玉溪懷
滄界泉云原泉浩蕩來洶洶一石屹立當其衝奔雷激湍

走萬里亂石飛出雙白龍涇清渭濁終難改爲問分流知
幾載濟物功成會有時佇看朝宗入滄海篔簹谷云我家
有園沱水曲日對此君看不足頻年驅馬逐塵埃無竹真
堪令人俗何來萬个凌青霄含烟解籜風蕭蕭會當攜客
參玉版食肉免受東坡嘲漁璜懷渭亦有界泉篔簹谷詩
余尤愛其龍洞詩云眾山磊磊如連鰲危崖突兀珠江皋
下臨不測驚洪濤雲峯上插青天高中有神物聲怒號雷
霆震撼風腥臊鼃鼃辟易魑魅迹白晝慘澹陰雲膏槎杓
鱗鬣相周遭昏瞑洞壑深崩壘爲霖爲雨資勤勞坐使宇
宙恩光叨我來辟彼升木猱攀援首每低於尻心搖目眩

神怛怛一墮終懼不可撈蜀中最險斜與褻連雲棧細如
秋毫到此始驚堅且牢化工鬼祕誰其操仰天欲問頭頻
搔唐碑宋碣埋蓬蒿靈谷肯使終藏韜細觀使我歌牢騷
天風浩蕩吹颺颺眾妙峯云一朵青芙蓉到此忽逞怪插
根極九淵眾妙來天外亂山去逶迤奔走如僮价有時形
突兀嚴兵列長械有時勢盤紆窮邊設重隘頓失天宇寬
蒼茫雜陰晦窮態更極研天工亦狡獪賈勇躋層巔登臨
時一快人與猿猴爭路出飛鳥背石确怒當頭如坐復如
拜山腰蕭寺嵌懸崖古松挂飛瀑溯然來噴擊珠光碎俯
瞰萬井煙河流爭一帶古木與壽藤千年歷弗壞不知所

陟高陰雲空霽霽下界聞疎鐘一聲發清籟

后稷之生置隘巷牛羊腓字置寒冰而鳥覆翼拘泥者以爲誕然楚子文虎乳左傳亦言之順慶府西充縣有大人跡某氏女履其跡而孕生子棄諸野馬牛避弗踐鷺鷥以羽覆之母收以養及長舉進士不仕奉佛講經青蓮山青蓮擁出八龍聽講今有八龍池在縣南高僧猶如是后稷

又何怪焉

僧似宋時人未詳

康熙己卯科人以乩卜詢內江中式名數僅書一品字眾莫解其兆揭曉雋何顯祖祝天錫喻宏林三姓俱有口始悟品字之意內喻以是年五月入庠聯雋鄉榜占時尙逐

童子軍尤爲仙機莫測

金蓮渠縣人不知姓生員陳其珍之婢也嘉慶癸未九月
教匪破渠縣金蓮負其珍幼子逃走爲賊追及令棄其子
隨之去金蓮泣曰吾主暮年止有此子死則死斷不肯棄
賊怒將殺子以身蔽之被數刀猶不移賊乃捨去金蓮死
子卒得活

金川木果木之難文臣殉節者甚眾崇慶牧常公名紀字
理齋奉天承德人丁丑進士平日讀周遇吉傳慷慨擊節
泣數行下隨大兵剿賊管西路收支糧米營潰挺刃與賊
鬥殺二人傷一人賊眾不支被害於昔嶺贈道銜有殉節

錄程尙濂題其後云昔聞寧武周將軍守關竟自抱關死
取義成仁古所云浩氣撐扶照青史常公擊節遇吉傳掩
卷唏噓不能已固知此事本性生讀聖賢書義應爾一朝
遇變以身殉畢吾事焉而已矣我讀文山正氣歌千古忠
純一僂指死節死事誠有間氣矜之隆寧足擬逆酋犯順
逞螳臂么麼跳梁如聚蟻昔嶺相距猶經旬非云壓境摩
吾壘就令避舍以待援要非首鼠兩端比公曰義在何所
逃慷慨捐生直如矢守土與土爲存亡此事胡容更推委
炳焉義烈詎偶然見危致命亮如此 天子褒忠卹殊典
俎豆穹窿崇廟祀忠魂歸來復奚憾寧僅清白貽孫子蜀

山碧血燕山祠大節嶙峋應共峙

張寧陽字楓庭浙江仁和監生膳錄館議敘潼川府經歷
嘉慶元年升東鄉知縣九月達州教匪作亂縣無城與賊
營僅隔一水楓庭百計捍禦日不甘食夜不解衣者三閱
月冬晴水落賊涉淺登岸遂手刃數賊而死時除夕前一
日也明年賊退跡其屍不得忽羣鳥聚噪不已則壤垣下
稍露手足蓋路人哀而覆之者掘視之面如生吳秋魚昇
與交善哭之云憶昔從君呼小友我博微名君不售我年
未冠且雌伏君挾奇才遂北走果然青眼遇孫陽盡散黃
金酬漂母作椽名邦興頗豪論功絕塞人無耦人生會合

自有期我亦驅車過隴右萬里同歌蜀道難卅年重飲論
文酒君方縮綬宰卜蒲卜蒲縣小纔如斗三版城基已就
傾盈盈帶水難爲守無端伏莽起東川歲在丙辰月在酉
賊重如山復據山俯窺易可探囊取周遭白芳布河壩出
沒黃巾遍林阜夾水相持秋復冬可憐顏鬢都衰朽赫赫
袁何兩總戎援師間道攻其後鑿兵三日士不疲礮石如
雷萬山吼誰信魚門蠱毒深大星同日歸烏有從此天機
孽歛張危城已入長鯨口十日不雨吹乾風河干偵邏嚴
宵擷賊如行蟻蹋水來白旂搖搖各在手力窮矢盡賊不
退六百勁兵齊授首舉刀殺賊一賊死萬賊萬矛來貫肘

整纓就義爲賊言殺我毋傷我童叟嗚呼男兒死耳分內
事可惜堅持三月久

吳秋漁與毛海客皆遊幕山左後皆官四川吳宰崇寧毛
牧簡州教匪之亂海客率兵役壯勇禦賊死越日僕某入
中門大呼曰我毛某寄魂僕身呼家人羣集言曰我臨陣
馬蹄故被害今被召敦迫不及畱吾行矣家人乃殺馬祭
之秋漁輓以詩云噫吁嘻毛簡州君乃海上狂客邈焉寡
儔後車十乘作賓諸侯胡爲乎名心躍躍老不休白首忍
作籠頭牛一官不過丞與掾載筆直走天西頭齊腰飛雪
埋不死絕域生還輕萬里正是蠻方結陣雲又來礮火槍

烟裏捷書屢奏官屢遷懷中若若青綬鮮西歸特許作循
吏升堂打鼓如神仙無端一夕驚烽舉賊騎宵馳疾於駛
守城事易禦賊難刺史請行羣吏止徵兵夜出城募卒朝
授矢倉皇一飯聞馬嘶上馬馬顛鞭不起馬不起賊至矣
交胸刃白血濺紫可憐海內才人死噫吁嘻毛簡州從軍
十載如遨遊半生出入萬死地不介不胄心休休生還乃
適得死所造物巧弄將焉尤靈旗颯颯魂來歸白日竟作
中堂畱老妻驚仆幼孫哭大呼去矣但聞繞屋風颼颼惜
我其時未得同嗟諷不然好與一長慟有淚灑向吳淞流

秋漁後以軍功升官

按通志毛大瀛陣
亡在五年三月

嘉慶元年十一月重慶鎮總兵袁國璜山苗疆領兵五百至東鄉直逼賊營賊首徐添德率眾急攻三晝夜不得息適陝西延安總鎮何元卿領兵五百從冉家壩土地埡轉出攻其旁賊始退遂合兵老營巖或呼老營灣樹巨木編竹用生牛皮纏縛結寨掘長壕布鐵蒺藜賊劫寨輒敗去于是四五月無動靜以怠我師軍令每黎明黃昏官兵百人出營放鳥槍一通喊三聲一日侵晨大霧號聲未絕賊起壕邊擲火毬百萬如流星外用長繩飛鉤拔柵倒地平壕萬眾撲入殺聲震數里火光滿帳兩總鎮亡兵士無一免者二將最饒勇袁尤傑出秋漁有詩哀之云老營巖石齒齒

二總戎同日死本是桓桓宿將材可憐裹革空山裏吁嗟
此戰何雄哉黃金散盡死士來十人選一一當百誓不殺
賊死不回山前大戰三晝夜霹靂礮車劈山破破山賊走
山上山賊頭紛紛半山墮賊營無煙夜無火賊孥聚哭官
軍賀連營鼓角聲震天軍吏垂幃帳前坐五更月黑賊復
來大霧四塞午不開奔狼沸竅瘕狗噬白日星墮聲如雷
總戎雖死賊膽寒閉營三日不下山山東從軍者爲余言
賊詭降約期軍心盡懈漫不設備賊有潛下山者或見之
知必劫營桂提臺是時官方微使人間道以告不聽是夜
大霧賊盡伏壕中官兵不覺將曉或赤身出帳漫放一鎗

應故事賊突入皆不及衣俯首受屠惜哉秋漁隨軍營聞
見最真嘗書事云夜宿晨餐卒歲勞三秦三楚路周遭近
來汲器都無用雨洗征衣血洗刀山頭號火燄薰天帳外
寒風力透棉莫笑營中無臥具夜來高枕鬪體眠

達音泰滿洲鑲黃旗人以副將從征廓爾噶進攻聶拉木
越眾先登鎗子透膊墮崖落水遇救得出以功擢松潘鎮
總兵六十年檄赴黔楚攻剿逆苗陷陣衝堅所向克捷專
平晉甘肅提督仍畱川省剿辦教匪嘉慶三年首逆冷天
祿盤踞開縣祖師觀石磴矗雲盤旋一線提兵數千相持
三月仰攻不得達音泰勇氣憑陵提刀薄卡徒步搶上比

及兵力合撲而達音泰已被砍殞命沈庚軒輯弔之云將
軍與賊不兩立衣鐵馬鐵心亦鐵手中神箭發不虛射馬
射人洞其腋賊不知兵據山岳負嶠如虎不可迫自下而
上技莫施賊眾紛紛反投石麾下偏裨盡却退將軍率騎
入虎穴置之死地竟不生從古用兵戒深入沙場裹革生
平心可惜斷頭遭鼠齧金瘡雨洗吹血腥鬼雄尙欲掃妖
孽蟻聚蜂屯已挫鋒黃巾指日盡消滅白骨縱使烏鳶啄
青史長畱肝膽赤自來臨陣偷生人幾見姓名書竹帛先
是乾隆四十六年尙書周煌奏四川喇匪有朋頭名號乘
馬坐轎白晝搶劫至是與教匪勾結滋事諸公不止焦頭

爛額幸兵威者定總統額勒登保參贊德楞泰及諸將帥
智勇兼擅殄滅匪類四川官紳或作紀或作詩以頌功德
而死事諸公亦遂與日月爭光矣

參贊德公忠勇多謀前後斬獲渠賊姚之富齊二寡婦高
均德高二羅其情冉文儔龔文玉卜三聘楊開第龍紹周
徐國謨閻紹青等當冉添元倫渡嘉陵江西川大震將軍
追剿擒斬略盡梓潼士民立碑紀恩大書將軍官階及萬
民感戴字楚督陶雲汀作歌紀之云妖星夜向西川地長
蛇吮人血流赭赫然一震迅雷霆將軍旗鼓從天下憶昔
么麼煽亂初祭酒鬼卒號嗚嗚始出襄鄖及唐鄧遂渡漢

汚穿夔巫數千里內肆蹂躪勢若火燎秋原枯卓哉將軍
好身手長嘯欲激龍泉吼健銳故是飲飛兵叱咤曾令逆
苗走有 詔將軍兵最精指揮更作巴西行西行幾載冒

鋒鏑驀澗緣崖事搜剔霜刀不放鯨鯢逃晴空屢見鷹隼

擊遂得籌參表令公謂經略公將遙看檣樹揚無敵謂

督揚公三巴已清人可耕移兵北向趨階成誰知晝伏夜

復動窮穴突出颺與颺將軍聞之捲甲返疾馳颯若風雨

聲是時羣賊正蠢起我軍新敗鼓聲死總兵朱射斗戰沒

死者十餘員 欽鴉得意毛羽張投鞭欲斷涪江水士女倉黃如

亂麻牽衣跣足哭不止將軍下令整且嚴持滿勿發視吾

矢餓鴟忽叫箭滿眼十萬賊人同草靡

賊合黃賊徐萬富青號汪瀛線號陳

得俸等十數萬人蜂湧迎戰將軍令軍士持滿俟賊近乃發萬箭齊出遂擒陳得俸殲冉添恆冉添元帶箭而逃

窮追五日四接戰手斬鴟狐戮封豕

賊自武連驛奔江油五日四戰射獲冉添

元及楊正明陳國祥鮮其順等冉添元輕騎進解四寨圍善用埋伏為眾所推既就擒賊遂大潰

歡聲上沸天雲委

和號賊張子聰雷世旺等渡潼河焚太和場追躡大破之斬雷世旺生擒數千

人時谷成太和仁和仁義四寨為賊所攻哭聲震地大軍至賊驚遁圍解難民萬餘詣營叩頭而去

岸遂肅清

賊連敗於中江三臺殺偽總兵張長生等餘賊搶渡嘉陵江追及擊以大砲殲溺殆盡自是賊

不敢西渡望見將中旗幟輒走蜀人至今廟祀之

重脫刀兵事耘耔嗚呼此戰何

可無稍緩須臾蜀危矣祇今事隔十年來陰雨猶聞鬼夜

哀山坡往往拾遺鏃斑爛血色凝蒼苔豐碑屹峴當道路

惜無文字鐫崔鬼我行棧道線若線恍惚當年此酣戰如
公自是頗牧儔卻憶潢池誰召變

教匪初起建白旗幾人以官逼民反爲辭

善學孫吳書不如且讀循良傳

沈庚軒悒額經略平賊詩云額經略遼瀋人稜稜瘦骨鐵
精神六韜不讀知大略甲兵十萬胸中屯平生大小數百
戰所向無敵真將軍歲在丙辰黃霧起秦隴楚蜀數千里
跳梁小醜肆喧歷將軍一到民生矣安堵無譁法約嚴一
軍皆驚違令死公能將將 天顏喜 詔加經略貂蟬珥
細柳森沈勝算操四載賢勞堪屈指己未春正忽奉調銳
師悉統趨秦徼鼠輩伺隙渡嘉陵將軍一去羣狐嘯我公

至陝西西人交慶蜀人悲奪我福星去使我父哭其子夫
哭妻淒淒惻惻滿江堤定陝兵回旋靖蜀巴人快覩元戎
蠶疾雷不及掩賊耳拉朽摧枯如破竹千里銜枚走若飛
爲感將軍心置腹動地歡聲眾怒消執鞭願作將軍僕笳
鼓聲過萬戶安成功五月兵非黠旄頭掃迹畫凌烟八方
無事太平年回思甘苦同烽挫民到於今淚似泉

陳公瓚粵東進士督學四川廉潔不徇自校試卷一僕供
炊公閱文偶暇周覽署中隙地手摘野菜爲蔬有大位爲
子弟說優等漫應曰看文何如竟不查號而劣之巡考未
周陞去贖俱不受官至巡撫臨邛東門外碑曰眞宗師陳

夫子名璜字月川粵東人鐫其旁曰文郁郁廉所獨高山

流水永尸祝

陳公康熙年間任

郭縣石公礎之僕名小保侍饌父父垂八旬無齒牙每廚分甘脆必損口以奉父得雞豚肉未甚熟者以罐煮極爛饗殮續進侍主幕遊不拘遠近得果餌可久存者彙集歸致於父向廷廣咏之云反哺慈烏見此兒此兒天性不曾漓世間梟獍多無算卑賤敦倫卽我師

僕僕爲蜀患久矣每出巢焚掠官兵剿除卽遁歸兵歸乘隙出雖極力坊堵而附近夷地者每每受害偶檢故紙有詩皆言夷地事與李海帆觀察咏難民者相類疑亦當時

人作也錄之山險斷復連沿山墜尺土拾石種荑稗鑿洞
開牖戶勢難聚族居跬步凜踴踴藉免填溝壑何暇憂豺
虎豺虎攫人食肆惡紛難數盤踞氛日熾子求兼子取日
昨突然來遍山飛強弩屠我堂上親戕我懷中乳妻孥被
牽縶雞豚遭俘虜竄伏荆棘中肌膚無完縷歸尋四壁空
灰燼沒兩股潛聲不敢哭如刀截肺腑此憤何由舒此恨
終難補擬將眾志聯同仇奮千櫓剿殺無遺類庶幾憤恨
吐所恐農代兵荷鋤無隊伍鶴唳膽已寒兆禍誰作主遂
使寇益張邊防壞靡監死卽膏泥塗生亦墮網罟纍繫赴
涼山利收三倍賈嗟哉長吏心傷哉邊民苦欲走苦無脛

欲飛苦無羽青燐終夜號白骨隨草腐孑然剩一身不如
膏鎖斧天寒依山棲灑涕紛如雨

毀巢行

日暮鬼神愁男婦

被掩執全家親骨肉四散分頃刻欲哭竟無淚欲死那能
得藤索繫其胸刀斧逼其側險山豎劔鋒狹路盤荆棘牽
曳如牛羊絕徑費攀陟肌膚無完肉足脛血淋濕弱者溝
已填強者縛轉急驅入豺狼窟鞭箠魂魄朝役冒毒瘴
暮憩半維繫骨立饑腸鳴藜蒿齧殘汁天寒四肢僵破瓊
圍要褱雨淋五夜冷崖洞伴鬼蜮終身羈奴隸骨白無由
黑

夷俗以黑骨頭爲主
人以白骨頭爲奴僕

低首念家園冥冥關塞隔殃禍空

中墮愴懷慟離析椿萱存莫卜妻孥死莫測惟餘螻蟻命

偷活屈呼吸梟獍奉作主俯首學啾唧

不能作蠻語

日昨

蜂擁出夷氛無時戢傳聞又大獲繫纍及童穉長坂逢老

婦蹙蹙走劣窮詢是比鄰姪鳩形苦難識四顧闐無人相

與訴酸惻何時脫網羅吞聲不敢泣

擄入夷巢嘆

被擄栖夷巢

旅夢念鄉貫同難計多人慘死已過半欲逃不得逃追獲

骨折斷忍辱復忍饑餘生畱一綫日昨結隊出焚搶計已

慣室餘老蠻婆跛聾手足顛趁此不復還何日能得閒來

時嘆茫茫歸路實漫漫晝依箚莽伏夜迷山谷竄足腫仗

匍匐腸鳴忘噉噉驚悸動魂魄四顧時流盼命縱喪烟燴

魂期遊里閑竟夜雨淋漓四體積揮汗陡然墜懸崖自分

葬深淵忽聞更鼓聲烽火照璀璨疑虜復追來潛蹤泄膽
戰須臾濃霧收烟爍列戍見呼顛慘無聲拖曳始登岸百
死畱殘喘慟定血淚濺網破鳥出罟柳折魚脫貫迴思穽
蹇難身已瘡痍徧何幸得生還晦冥慶復旦踉蹌尋故居
鄰里各逃散室廬蕩無存骨肉同遭難聊棲棲莽閒歛歔

復感嘆

逃難行

遂寧呂文肅公大器號東川督師荆楚大將左良玉偃蹇
求爲書扇公題款曰東川老人永明王時督師川中大勢
日去憤惋以卒郫縣孫瘦石鎮得其鎮紙博一寸二分長
六寸三分面刻梅花一株左書疏林深處梅花笑知有幽

人蹋雪來欸題東川故物流傳可寶也瘦石咏以詩中有
云故園春燕巢林木白日荒村聞鬼哭靴裏冰寒光弼刀
林中淚濕寇公竹小片梅花鐫折枝日日書帷索笑遲關
山凍合無樵徑寓堂園林踏雪時結云張良破產總爲家
包胥哭師已無楚又云後先光儀玉帶生伯仲汝社詩人
鐵如意比以文信國趙忠毅之遺物不愧也

萬里橋在成都城外黃紹贊詩云萬里長江勢橫開第一
橋溯源來灌口急浪撼吳潮客路東風送天涯北斗遙亭
前還折柳別意水迢迢通體風格適上弟紹補
瀘州牧黃杏川魯溪子也閨閣亦多能詩